

**NitamashtilisteKwal  
Yehshwa-Kristo yewal  
kikwihkwilo Markus**

El Evangelio según Marcos  
en  
Nahuat del Este de Durango



**LigaBíblica®**  
INTERNACIONAL

Primera edición  
El Evangelio según Marcos  
Nahuat del Este de Durango  
azd 18-001 2C  
©2018 Wycliff e Bible Translators, Inc.

Versión electrónica ©Wycliffe Bible Translators, Inc. 2019  
[www.scriptureearth.org](http://www.scriptureearth.org)

Licencia Creative Commons (Reconocimiento-NoComercial-  
SinObraDerivada 4.0 Unported)

- Compartir — Usted es libre de copiar, distribuir y comunicar públicamente la obra.
- Reconocimiento — Debe reconocer los créditos de la obra.
- No comercial — No puede utilizar esta obra para fines comerciales.
- Sin obras derivadas — No se puede alterar, transformar o generar una obra derivada.

(<http://creativecommons.org/licenses/by-nc-nd/4.0/>)

# NitamashtilisteKwal Yehshwa-Kristo yewal kikwihkwilo Markus

---

Yuhanes takwateki ka miyak takam pa se tal kaha  
tawak amo'ak mochanti

(Mt. 3:1-12; Lk. 3:1-9, 15-17; Yh. 1:19-28)

**1** <sup>1</sup>Yok okipewaltik nitamashtilisteKwal ipa Yehshwa-Kristo, nikonDyos.

<sup>2</sup>Yok kina kikwihkwilo YeshaYah niTaketsal nitahtolDyos: Newal niktake notanawatil ta'ishpa pa tewal, pa tikchiwas n'otim pa ininyoliliste masewalme.

<sup>3</sup>Mokaki tsatsiliste ompa pa se tal kaha tawak:

“Shikchiwak n'otim pa ininyoliliste masewalme pa kwah walas TATS.<sup>a</sup> Shiktapolik ot.”

<sup>4</sup>Takwatekiyaya Yuhanes pa se tal kaha tawak, kinmiliyaya masewalme pa yeloskya takwatekilme, pa kichiwaloskya ten kwal pa kineshtiske kampa kikweptikat ininta'ilnamikiliste wan kineshtitikat kampa kikweptikat ininyolme ka Dyos ka inintachiwaliste kwahkwalmelme, yok yeloskya ta'ihnililme ininta'ihtakoliste. <sup>5</sup>Walaloya pa kishki tal Yudaya pa kikakiloskya, wan niyok pa in Wepweblo Yerushalém; kinkwatekiyaya Yuhanes pa in atenko itok Yordán, kinpakaloya ininta'ihtakoliste ka Dyos.

<sup>6</sup>Yuhanes kipiyya nishashalme tachiwalme ka nitohmi kameyo, mokwehtiyaya ka kwero, kikwaya chapolme wan nekte ta'onanal pa kwawim. <sup>7</sup>Kinmiliyaya, nitanawatilisteDyos inik masewalme:

—Walas se yewal kipiyyas miyak chikawaliste yewal newal amo nikpi, amo nimonots pa nimopachos niktomilis nikorreya niwarach

---

<sup>a</sup> **1:3** Wal TATS: “Shikchiwak anmoyolme kwal, ankikishtitikat yewal mochi ta'ihtakotik. Shihmelawak anmoyolme kina kimehmelawaloskya ni'ot se we.”

wan pa niktikipanolili nihan tipit. <sup>8</sup>Newal annimishkwatekiyaya ka at; yewal anmishkwatekis ka in EspirituSanto.

### **Yuhanes kikwatek Yehshwa**

(Mt. 3:13-17; Lk. 3:21-22)

<sup>9</sup>Pa inik tonatim Yehshwa katka pa pweblo itok Nasaret, yewal onka pa in tal Galileya, wan Yuhanes kikwatekiyaya Yehshwa pa atenko itok Yordán. <sup>10</sup>Okis Yehshwa pa at, haniman okit motap in takpakIlwikak, okit kampa in ilwikak motapowaya wan in EspirituSanto temowaya ipa yewal kina se wilot. <sup>11</sup>Mokak Dyos nitahtol pa ilwikak kiliyaya:

—Tewal nokon niktasot; nikpi miyak pakiliste pa tewal.

### **Satán kinek kitilanas niyol Yehshwa**

(Mt. 4:1-11; Lk. 4:1-13)

<sup>12</sup>Kwakin niEspirituDyos okichiwalti pa yaskya Yehshwa pa se tal kaha tawak. <sup>13</sup>Wan ompa omoka 40 tonatim ompa katka Satán, kinekiya kitaniliskya Yehshwa niyol pa kichiwaskya ten kitsakwili ka Dyos. Ompa katkaloya inik tekwanim yewal yolil pa kwawim, walak nitanawatilanelme wan kitikipanoliloya.

### **Nitikipanoliste Yehshwa**

(Mt. 4:12-17; Lk. 4:14-15)

<sup>14</sup>Se tonat kitsakwak Yuhanes, Yehshwa oy pa Galileya, kinnawatiyaya masewalme nitamashtilisteKwal kina reynaro Dyos. <sup>15</sup>Kinmiliyaya:

—Ashka o'as in tonat, amo wehkawas tonat kwah Dyos reynaro. Shihkwepak anmoyol pa Dyos kina kinek, shihneltokak Dyos nitamashtilisteKwal.

### **Yehshwa kinnots nawi ta'asyanilme michim**

(Mt. 4:18-22; Lk. 5:1-11)

<sup>16</sup>Ompa panowaya Yehshwa itenko in we'atTemtik pa Galileya, ompa okinmit Shimón wan ninohni André'as. Katkaloya ta'asyanilme michim, kintastikatkaloya mataraya ipanta we'atTemtik. <sup>17</sup>Yehshwa kinmili:

—Shinishtokak newal, annimishnishtili kina ankinpihpiloske takam.

<sup>18</sup>Kinkawak ininmataraya' ka ta'asiloya wan haniman kitokak Yehshwa.



*Yehshwa kinnots Yakobo wan Yuhanes  
pa kitokaske (Markus 1.20)*

<sup>19</sup>Onehmem amo wEhka okit Yakobo, wan ninohni Yuhanes, yehwante ininpilwam SebadYah, ka oksek katkaloya yehwante pa in barkit tatsomtikatkaloya kaha katkaya tsayanki ininmatarraya ka ta'asiloya. <sup>20</sup>Haniman okinnots Yehshwa; yehwante kinkawak pa in barkit nitats SebadYah niyok yehwante tapalewilme hani kitokak Yehshwa.

**Se takat kipiyya yehyekat katsak**  
(Lk. 4:31-37)

<sup>21</sup>Asik pa tal itok KaparNahum; pa in tonatmosewilyudiyo okalak Yehshwa pa in tyopYudiyo ompa taneshtiliyya.

<sup>22</sup>Inik masewalme kintaneshtiliyya ka chikawaliste kina se wetatakewan, amo taneshtiliyya kina yehwante Tamashtinilme NitanawatilMoshé. <sup>23</sup>Wan ompa katka pa in tyopYudiyo se takat kipiyya yehyekat katsak, kipewalti tsatsiliste:

<sup>24</sup>—Ten tikpi ka tehwan, Yehshwa tewal otikis pa in pweblo Nasaret? Otiwal pa titishtamis? Nihmat ak tewal, niChipawak Dyos.

<sup>25</sup>Kwakin Yehshwa oki'ahwa chikawak yehyekat, wan kili:  
—Amo shinawatiti, wan shikis pa yewal!

<sup>26</sup>Kwakin in yehyekat katsak kitsehse chikawak takat, wan tsatsi chikawak, okis pa takat. <sup>27</sup>Wan ompa moshte momaptitikatkaloya, motahtanililoya sek ka oksek:

—Ten yewal in? Se tamashtiliste yankwik kichi kina se wetatakewaliste! Yewal kintake yehyekatim kahkatsak, wan kineltokal!

<sup>28</sup>Haniman moshte kimatiloya pa tal Galileya yewal kichiwaya Yehshwa.

### **Yehshwa kipahti nimonantsi Petros**

(Mt. 8:14-15; Lk. 4:38-39)

<sup>29</sup>Kwah okisak pa in tyopYudiyo, ompa Yehshwa oy inak Yakobo wan Yuhanes pa nikal Shimón wan André'as. <sup>30</sup>Nimonantsi Shimón tastikatka pa nitapeshte kipiyyaya atonawiste; wan kinawatik Yehshwa kampa katka kokoshke. <sup>31</sup>Kwakin mo'ashilti Yehshwa, okikitski nimahwa okital pa nitapeshte; opahti siwat yahmo kipiyyaya atonawiste, kwakin kintamakaya.

### **Yehshwa okinpahti myak pa in tonat**

(Mt. 8:16-17; Lk. 4:40-41)

<sup>32</sup>Kwah otamalin tonat wan tapohpoyapti, kinwalikilik Yehshwa moshte kokoshkim wan yehwante kipiyyaloya niyehyekatim tawalilom; <sup>33</sup>wan moshte pa in Wepweblo monichikoloya pa nitatapoli kaha kalakil. <sup>34</sup>Okinpahti Yehshwa myak kokoshkim ka myak takokoliste, ma yok amo kinmakawalti Yehshwa niyehyekatim tawalilom pa tahtoloskya, kampa kimatiloya akyewal.

### **Yehshwa kintakichilitinem pa Galileya**

(Lk. 4:42-44)

<sup>35</sup>Tahtanesti, kwah ayamo'ok tanesiyaya kwal, omokets Yehshwa okis pa in Wepweblo, oy kaha amo'ak katka, ompa Dyos kitahtaniyaya. <sup>36</sup>Shimón wan in oksek ninihniwan katkaloya inak yewal wan oyak kitemok, <sup>37</sup>kwah kitak kilik:

—Moshte mishtemotikat.

<sup>38</sup>Yehshwa kinmili:

—Ma tiyak pa oksek pweblo', ma tikintakichilik ompa niyok nitanawatilisteDyos: Kampa ka yewal niwal.

<sup>39</sup>Yok kintakichiliyaya nitanawatilisteDyos pa in tyopalmeYudiyo', pa kishki Galileya, wan niyok kinkishtiliyaya ininyehyekatim tawalilom.

### **Yehshwa kipahti se yewal palantikatka inakayo**

(Mt. 8:1-4; Lk. 5:12-16)

<sup>40</sup>O'as se takat ka Yehshwa kipiyyaya kokoliste itok lepra,<sup>b</sup> yewal mokahkashkarotikatka nikwero inakayo. Motankwakets ka Yehshwa wan kili:

---

<sup>b</sup> 1:40 "Lepra" in kinek kito mokahkashkarotikatka nikwero (inakayo).

—Ta hanwel tihnek, shinishpohpo shinishpahti.

<sup>41</sup>Yehshwa ki'ihnil, wan kitalil nimahwa, wan kili:

—Nihnek. Nimishpohpowas pa tipahti shipahti.

<sup>42</sup>Kwah kito in tahtolme, yahmo ones ninaka palanki itok lepra, wan yok moka tapohpowali opahti. <sup>43</sup>Haniman Yehshwa okitake pa mokwepaskya, ma yok ka miyak chikawaliste, kili:

<sup>44</sup>—Shikit, amo'ak shikil amoten; shi shimoneshti ka totats, wan shitemak mochipawaliste, yewal kina tatake Moshé pa yes taneshtiliste, ka in tachiwaliste kampa tewal otipahti.

<sup>45</sup>Ma yok kwah okis in takat, taketstinem wan tanawatitinem kaha han kina okipan. Kwakin Yehshwa amokwal kalakiskya inik Wehwepweblo', kampa takam kimatiloya kaha katka yewal. Yok omoka kiyawak kaha amo'ak mochantiyaya; walaloya takam kitaloya pa mochi inik pweblo'.

### **Yehshwa kipahti se takat amo nehnemiyaya**

(Mt. 9:1-8; Lk. 5:17-26)

**2** <sup>1</sup>Panok sek tonatim, Yehshwa walmokwep oksep pa in pweblo KaparNahum; kimatik masewalme kampa katka pa kal. <sup>2</sup>Monichikoloya myak masewalme, yok yahmo kinasiyaya pa kiyawak in kal nitatapoli kaha kalakil; Yehshwa kimashtiyaya nitahtolmeDyos. <sup>3</sup>Kwakin asik nawi takam, kiwalikaloya se yewal amo nehnemiyaya. <sup>4</sup>Wan amokwal kina asiloskya ka yewal, kampa katkaloya myak, kikoyonak ikpak takalchiwal melahka kaha katka Yehshwa, kitemowik pa nita-  
pech in amo nehnemiyaya. <sup>5</sup>Yehshwa okit kina kineltokaloya pa kipahtiskya, kili kokoshke:

—Nonihni, ashka mota'ihnakoliste moka ta'ihniliste.

<sup>6</sup>Katkaloya sek takam Tamashtinilme NitawanatilMoshé ompa yowatikatkaloya, tamatiloya pa ininyololme: <sup>7</sup>“Pates yok tahtotik kina se we? Yok kina kitotik amokimawishtiliDyos, akyewal ta'ihnili ta'ihnakoliste, amo hanwel Dyos ta'ihnili.”

<sup>8</sup>Kimat Yehshwa pa niyol kina tamatiloya yehwante, kwakin kinmili:

—Pates yok antamatitikat pa anmoyolme? <sup>9</sup>Ta hanwel antamatil ta yok kwal nikilis in amo nehnemi: “Mo'ihnakoliste onka tapohpowali”, ma yok ta nikil: “Shimokets, shikonan motapech wan shiyapti”? <sup>10</sup>Ta yok omotachi kwakin mokawas

taneshtiliste kampa NitakaTakpakIlwikak<sup>c</sup> kipi pa tal chikawaliste pa ta'ihnilis katsawaliste.

Kwakin Yehshwa kili in takat yewal amo nehnemiyaya:

<sup>11</sup>—Shimokets, shikonan motapech wan shiyapti kaha timochanti.

<sup>12</sup>Kwakin haniman omokets in takat; wan okonan nitapech, okis pa ininishpa moshte. Kwakin moshte mo'ihitatikatkaloya wan kililoya tahtolme wehwe pa Dyos, kitoloya:

—Amo'ik tikitaloya, kina in ten kichi.

### **Yehshwa okinots Lewí**

(Mt. 9:9-13; Lk. 5:27-32)

<sup>13</sup>Oksep okis Yehshwa pa itenko in we'atTemtik; wan mosh-te walaloya kaha yewal, wan yewal kinmashtiyaya. <sup>14</sup>Ompa kwah panotiyaya pa ot, okit nikon Halpayo, itok Lewí yowatikatka kaha tahtanil miyak tapishkalisteTomi,<sup>d</sup> wan Yehshwa kili:

—Shinishtok.

Omokets Lewí wan okitok.

<sup>15</sup>Kimani Yehshwa takwatikat kaya pa nikal Lewí, niyok yehwante myak tahtaniloya tapishkalisteTomi<sup>e</sup> wan ta'ihதாகolilme motalik kaha takwal inak Yehshwa wan nimoneshtililme; kampa katkaloya myak yehwante kitokaloya. <sup>16</sup>Wan sek Tamashtinilme NitawatilMoshé wan inik parisheyo', kitatikatkaloya kina takwatikatkaloya ka Yehshwa moshte yehwante, wan kintahtanilik nimoneshtililme:

—Pates ompa yowatik anmotamashtini kaha takwatikat wan takontikat takam yehwante tahtaniloya tapishkalisteTomi wan ta'ihதாகolilme?

<sup>17</sup>Kwah okikak in, Yehshwa kinmili:

—Amo moteshmonekil tapahtinilme nahyehwante amo kokoshkim, hanwel moteshmonekil ka in kokoshkim. Newal amo niwal nikinnots in kwahkwalmel, hanwel nikinnotsas in ta'ihதாகolme.

<sup>c</sup> 2:10 NitakaTakpakIlwikak: Yewal nikonTakat ka Gereko yok mo'itokaya yewal Yehshwa yewal kiteshmonekya pa tahtoskya ka isel.

<sup>d</sup> 2:14 “Contribuciones”: In kinek kito kampa temakaloya in tomi ka in wehwetatakewalme pa ten kiteshmonekiskya ka ininpwelblo.

<sup>e</sup> 2:15 “Contribuciones”: In kinek kito kampa temakaloya in tomi ka in wehwetatakewalme pa ten kiteshmonekiskya ka ininpwelblo.



**Yehshwa kitahtanilil pates amo mosawal nimoneshtililme**  
(Mt. 9:14-17; Lk. 5:33-39)

<sup>18</sup>Se tonat mosaptikatkaloya nimoneshtililme Yuhanes yewal takwateki wan nimoneshtililme in parisheyo', sek takam walak kaha Yehshwa, kitahtanilik in, kilik:

—Pates mosawal nimoneshtililme Yuhanes yewal takwateki wan in parisheyo', tewal momoneshtililme amo mosawal?

<sup>19</sup>Yehshwa kinmili:

—Amo monek mosawaske ninihniwan ka in mitotiliste, kwah monamiktil, kimani yewal monamikti onka ka yehwante? <sup>20</sup>Ma yok, asis in tonat kaha kikishtiliske yewal monamikti; kwakin mosawaske.

<sup>21</sup>'Amo'ak kiteki se koton shashal pa kitsomilis se trapo yankwik; kwakin in yankwik ki'oholo in koton shashal, wan kitsayana oksep. <sup>22</sup>Niyok amo'ak kitali nihugoUbaBino yankwik pa'itik pa in tekomat tachiwal ka kwero yewal kipi miyak tonatim; ta yok okichi kwakin nihugoUbaBino yankwik kitsayana in kwero, kampa amowel motilana, nihugoUbaBino mo'htako. Wan monek pa kitali nihugoUbaBino yankwik pa in tekomat tachiwal ka kwero yankwik.

**Nimoneshtililme Yehshwa kiwihwitaloya nitaki**  
**trigo pa in tonatmosewilyudiyo**  
(Mt. 12:1-8; Lk. 6:1-5)

<sup>23</sup>Pa se tonatmosewilyudiyo kwah Yehshwa panowaya kaha tatoktikatkaya trigo; nimoneshtililme kitekiloya nimiyawal.

<sup>24</sup>Kwakin inik parisheyo' kilik:

—Shikit, Pates kichiwal momoneshtililme pa in se tonatmosewilyudiyo yewal ten amokwal kichiwaske?

<sup>25</sup>Yehshwa kinmili:

—Amo anmomashtik ten okichi Dawid pa se tonat kwah yewal wan ninihniwan mayanak? <sup>26</sup>Yok okalak pa nikalDyos, katka ompa AbYatar in TotatsWe, kikwa Dawid in pan tatasotalme pa Dyos, han TotatsimWehwe kwal kikwaloskya; wan niyok okinmak pa kikwaloskya yehwante katkaloya inak.

<sup>27</sup>Niyok kinmili:

—Dyos okichi se tonatmosewilyudiyo ten kwal pa se masewal, Dyos amo okichi masewal pa yok kichiwas se tonatmosewilyudiyo. <sup>28</sup>Kampa, NitakaTakpakIlwikak yewal

niyok TATS kipi chikawaliste pa nikinnawatis ten kichiwaske masewalme pa in se tonatmosewilyudiyo.

**In takat yewal kipiyyaya se nimahwa wak**

(Mt. 12:9-14; Lk. 6:6-11)

**3** <sup>1</sup>Oksep okalak Yehshwa kalitik pa in tyopYudiyo; ompa katka se takat kipiyyaya se nimahwa wak.

<sup>2</sup>Kikwitaptikatkaloya Yehshwa inik takam kitatikatkaloya ta kipahtiskya pa se tonatmosewilyudiyo, kampa kinekiloya kitsa-kwaloskya. <sup>3</sup>Kwakin Yehshwa okinots in takat kili:

—Shimokets ipanta ka tehwane titat.

<sup>4</sup>Yehshwa kintahtanili:

—Ma yok kwal tikchiwaske pa in se tonatmosewilyudiyo, tikchiwaske pek ten kwal, tikchiwaske ten amokwal? Ma tikpa-lewik ma yol, hanwel ma mik?

Amo'ak nawatiyaya. <sup>5</sup>Kwakin Yehshwa kinmitatikatka ka kwalaniliste, wan moyokoltitikatkaya kampa ininyolme katkaloya chikawak, wan kili in takat:

—Shihmela momahwa.

Wan kimela, wan opahti nimahwa. <sup>6</sup>Kwakin kisak in parisheyo' haniman yehwane oyak ka Herodes taketsak, kinekiloya kimatiloskya kina kwal kimiktiloskya Yehshwa.

**Miyak kitokatyaloya Yehshwa wan asiloya pa itenko we'atTemptik**

<sup>7</sup>Yehshwa okis pa in we'atTemptik ka nimoneshtililme, wan niyok kitokatyaloya myak masewalme mochantilme pa Galileya wan pa Yudaya. <sup>8</sup>Wan pa in Wepweblo Yerushalém wan Idumeya, niyok walak pa analko in atenko Yordán, Tiros wan Tsidón oyak kitak Yehshwa kwah kimatik kina wehwe kichiyaya taneshtiliste. <sup>9</sup>Kwakin Yehshwa kinmili nimoneshhtililme pa kipiwaloskya se barkit kaha yewal kalakiskya, kampa myak masewalme yaloya kampa yok amo kipacholoskya. <sup>10</sup>Yewal kinpahtiyaya myak, moshte inik kokoshkim motohtopewaloya kinekiloya kikitskiloskya. <sup>11</sup>Kwah in yehyekatim kahkatsak kwah kitaloya, motankwaketsaloya ni'ishpa yewal wan ka tsatsiliste kitoloya:

—Tewal nikonDyos!

<sup>12</sup>Wan yewal okinahwa chikawak pa amo kitoloskya akyewal.

### Yehshwa kinonan 12 tatitanilme

(Mt. 10:1-4; Lk. 6:12-16)

<sup>13</sup>Yehshwa takis pa se tepetLom, okinnots pa walaloskya aki yewal kinek, wan yehwante monamikik ka yewal. <sup>14</sup>Kinonan 12 tatitanilme yehwante yeloskya ka yewal wan pa kitotiyaloskya tanawatiliste; <sup>15</sup>niyok okinmak chikawaliste pa tapahtiloskya wan niyok kinkishtililoskya ininyehyekatim tawalilom. <sup>16</sup>In 12 katkaloya: Shimón yewal niyok okitokayolti Petros; <sup>17</sup>Yakobo wan ninohni Yuhanes, yehwante ininpilwam SebadYah, Yehshwa okintokayolti Banerges, in kinek kili kampa inik takam katkaloya kina komoniliste; <sup>18</sup>in oksek katkaloya André'as, Pilipos, BarTolomay, Matayos, Tomás, wan Yakobo nikon Halpayos, wan Tadayo wan Shimón yewal kananteko, <sup>19</sup>wan Yudas IshKaryót, yewal kitemak Yehshwa.

### Sek takam kitoloya kampa Yehshwa kipiyya yehyekat katsak

(Mt. 12:22-32; Lk. 11:14-23; 12:10)

<sup>20</sup>Yehshwa okalak pa se kal wan oksep monichikok myak masewalme, kampa amokwal takwaloskya Yehshwa wan nimo-neshtililme. <sup>21</sup>Kwah kimatik yehwante nitahwan Yehshwa, oyak pa kwalikaloskya kampa kitoloya, amokwal onka yewal, kitol kampa kipol nita'ilnamikiliste.

<sup>22</sup>Sek Tamashtinilme NitanawatilMoshé walak pa Yerushalém, kitoloya:

—Kipi pa'itik yewal in yehyekat itok BálSebúb, wan ka nichikawaliste kinkishtili takam ininyehyekatim tawalilom ika nitapalewiliste niwetatakewan tawalilom.

<sup>23</sup>Kwakin Yehshwa okinnots, okinmil se tapowaliste:

—Kina kwal se Satán mokishtili isel, ta onka pa itik Satán?

<sup>24</sup>Ta se mochital tashelol ika isel, in mochital amo wehkawas;

<sup>25</sup>wan yehwante mochantil pa se kal, ta mokwalanilik se

ka okse mosesemanaske, kwakin yahmo monichikoske pa

mochantiske oksep pa in se kal. <sup>26</sup>Ta hanwel yok Satán wan

niyehyekatim mokwalanilil wan yok mosesemanaske, kwakin

yahmo wehkawas tawalilot, tami nichikawaliste.

<sup>27</sup>Hanwel amo mochika kalaki pa nikal se takat yewal kipi miyak chikawaliste pa kita'ishtikili ten kipi, hanwel monek pa kwal ki'ilpi in takat; wan kimani kwal ki'ilpi, wan yok kalaki pa kita'ishtikili mochiten yewal tapi.

<sup>28</sup>'Annimichilis melak, moshte inik ta'htakolme wan mosh-te inik amo kimawishtililDyos yeske tapohpowalme; <sup>29</sup>ma yok, Dyos amo kinpohpowilis yewal aki amo kimawishtili in EspirituSanto, amo'ik yes tapohpowali kampa kipi yas tawikiliste hanse.

<sup>30</sup>Yehshwa kito kampa yehwante kitoloya yewal kipi yehyekat katsak.

### **Ninantsi wan ninohniwan Yehshwa**

(Mt. 12:46-50; Lk. 8:19-21)

<sup>31</sup>Kwakin walak ninantsi wan ninohniwan, mokawak pa kiyawak, tatakewak pa kinotsaloskya Yehshwa. <sup>32</sup>Yehwante yowatikatkalo ya inak Yehshwa kilik:

—Monantsi wan monohniwanTakam wan monohniwanSiwam mishchishtikat kiyawak, mishtemotikat.

<sup>33</sup>Yehshwa kinnankili:

—Akyewal nonantsi wan nonohniwan?

<sup>34</sup>Kinmitaya yehwante kiyawalotikatkaloya, ka yewal, kito:

—Inik kat nonantsi wan nonohniwan. <sup>35</sup>Hanwel ak kichi kina kinek Dyos, yewal nonohniTakat, wan nonohniSiwat wan nonantsi.

### **Yehshwa kinmili tapowaliste ka se tatok**

(Mt. 13:1-9; Lk. 8:4-8)

**4** <sup>1</sup>Oksep kinmashtiyaya Yehshwa pa itenko in we'atTemtik, wan walak kitak myak masewalme. Kwakin okalak pa se barkit moka wehkit pa in we'atTemtik wan ompa omotal, wan mokawak in masewalme pa itenko in we'atTemtik. <sup>2</sup>Kwakin kinmashtiyaya myak tachiwaliste ka tapowaliste; wan kinmiliyaya se tamashtiliste:

<sup>3</sup>—Shihkakik in: Se takat oy tatok trigo. <sup>4</sup>Kwah tatokatiyaya, westiyaloya sek shinashte itenko ot; walak in totom pa ilwikak wan kikwak. <sup>5</sup>Oksek shinashte wetsik pa itsalaTetelme, kaha amowel kipi yaya we tal; amo wehka-wak haniman walkisak kampa amowel kipi yaya tal. <sup>6</sup>Kwah takis tonat, walkwitanik, kampa amowel kipi yaloya ninelwa, walwakik. <sup>7</sup>Oksek wetsik tsalaWistim; mo'apawak in wistim kintapach, in shinashtim amo takilme. <sup>8</sup>Oksek shinash-tim wetsik pa tal kwal. Omo'apawak wan temakak taki, pa se inintankwam kisaloya 30 wan 60 wan pa oksek 100 pa sesen.

<sup>9</sup>Kwakin Yehshwa kinmili:

—Yewal melak aki kipi ninakas ka takakis, shitakakik kwal.

**Pates kinmashtiya ka tapowaliste**

(Mt. 13:10-17; Lk. 8:9-10)

<sup>10</sup>Yok otam okinmashti, isel omoka Yehshwa, nahyehwante katkaloya kaha yewal inak tatitanilme ka 12 kitahtanilik ten kinek kitos tapowaliste. <sup>11</sup>Kinmili:

—Anmehwante anmishmashtitik Dyos ten oksek amo kimatil, anmishmashtitik kina Dyos reynaro pa mochital; wan yehwante amo kat ka tehwan, yewal kinmashti mochi ka tapowaliste yewal nitamatiliste; <sup>12</sup>ta hanwel tachiyal amo kitaske wan yok, ta hanwel takaktiyaloskya amo kimatiloskya ten kinek kitos, wan shimochipawaltik pa anmoyol wan shiktahtanik Dyos mishpohpowalis mota'ihentakoliste.

**Yehshwa kinmili ten kinek kili nitapowaliste**

(Mt. 13:18-23; Lk. 8:11-15)

<sup>13</sup>Wan Yehshwa kinmili:

—Amo ankimatil ten kinek kitos in tapowaliste? Kwakin kina ankimatiske ten kinek kitos mochi in tapowaliste?

<sup>14</sup>In takat yewal tatokatiyaya shinashte kina nitahtolmeDyos.

<sup>15</sup>Sek takam kat kina in tatokal yewal wetsik pa ot: kikakil nitahtolmeDyos, kwakin wal Satán kinkishtili in takam nitahtolmeDyos yewal kipiwaloya pa ininyolme yehwante.

<sup>16</sup>Oksek kat kina in tatokal yewal kisal pa itsalaTetelme: kikakil nitahtolmeDyos kineltokal ka pakiliste, <sup>17</sup>kat kina in shinashtim yewal amo kipiwal ninelwa hanwel yok amo wehkawal; kwah walal inik tonatim yewal kinpano se takokoliste niyok kwah kintohtokal in takam kampa kineltokal nitahtolmeDyos, yok yahmo kinekil kineltokaske. <sup>18</sup>In tatokal yewal katka nishinashte pa in wistim: kina yehwante niyok kikakil nitahtolmeDyos, haniman moyoktil, <sup>19</sup>ma yok amo ki'ilkawal pa ki'ilnamiktiyaske yewal kat pa mochi kishki tal, pa inik shiwim yehwante kinek-tiyaske kina kwal konanaske tomi wan kati mokwahkwamanal yewal kichiwal amokwal, kinek-tiyaske myak ten amokwal. Yok mochi kinihtako takam pa ininyolme yok kitapacho itahtol, kina se tatokal yok amo temakas taki. <sup>20</sup>Wan in tatokal yewal katka nishinashte pa tal kwal, yehwante kikakil nitahtolmeDyos wan kineltokal, sek kitaktil 30 pa se nitankwa, sek 60 oksek 100.

### Tapowaliste ka in tawiliste

(Lk. 8:16-18)

<sup>21</sup>Niyok kinmili:

—Ak kiwalik se kandel wan kitali pa itsinta komit niyok itsinta tapeshte? Amo, ankitalil kandel takpak, kaha kintawili moshte.

<sup>22</sup>Ma yok ten tatitikat wan yewal amo kimatil, kampa yok se tonat kimatiske. <sup>23</sup>Ta anmelak ankipiyal anmonakam, shitakakik.

<sup>24</sup>Niyok kinmili:

—Shikilnamiktiyak in yewal ten ankikakik. Hanwel ta anki'ilnamiktiyal, yok ankimatiske in ten kinek kitos. Hanwel yok kina antemakal, hanwel yok anmishkwepiliske. Wan yok anmehwante ankipiyaske miyak yewal antakakil kwal. <sup>25</sup>Ak kipi han, kima-kaske oksep, wan aki amo kipi, yok kikishtiliske yewal tipit kipiyya.

### Tapowaliste ka in shinashte

<sup>26</sup>Niyok kitowaya:

—Yok kina Dyos reynaro yok onka se takat yewal kitok shinashte pa tal; <sup>27</sup>kwah in takat kochis pa tayo, nehnemis tahka, in shinashte mo'apaptiyas wan amo kimat in takat kina mo'apaptiyas. <sup>28</sup>Mochi pa in tal isel nesi ninelwa; kwakin in shinashte, kikis nitankwa in tsimolinke ka nishinaste wan ka miyak nimiyawal; <sup>29</sup>kwah yoksi in taki, kwakin kisal takam pa kitekiske ka se wako, kampa o'as in tonat pa tapishkaske.

### Tapowaliste ka nishinashte mostasa

(Mt. 13:31-32; Lk. 13:18-19)

<sup>30</sup>Niyok Yehshwa kito:

—Ka ak nikintamachiwas nireynarolisteDyos, ka ten tapowaliste tikitoske pa tikinnishtiliske? <sup>31</sup>Onka kina nishinashte mostasa kwah kitokal pa in tal shinashte tipichi, amo onka okse shinashte tipichi yok kina ina pa mochital; <sup>32</sup>ma yok, kwah mo'apa in kwawit mochi we amo onka yok wehwe ka in oksek shinashtim ka in kwahmil, wan in totom pa in takpakIlwikak kinchiwal ininkalme ka nitasoway nimashaltik.

### Yehshwa tamashtiyaya ka tapowaliste

(Mt. 13:34-35)

<sup>33</sup>Yehshwa kinmili ka myak tapowaliste kina in, kintakichiliyaya ka nitahtolmeDyos kina hanwel kimatiloskya

kikakiloskya. <sup>34</sup>Hanwel kintakichiliyaya ka tapowaliste, ma yok kwah katka ka nimoneshstililme kinmiliyaya ka iselte ten kinek kitos tapowaliste.

**Yehshwa ki'ahwa in yehyekat wan in we'atTemtik**

(Mt. 8:23-27; Lk. 8:22-25)

<sup>35</sup>Pa in tonat, kwah tapohpoyapti, Yehshwa kinmili:

—Ma tipanok pa analko in we'atTemtik.

<sup>36</sup>Kwakin in masewalme mokawak wan nimoneshstililme Yehshwa kiwikak pa in barkit, niyok oksek barkito' oyak.

<sup>37</sup>Kwah ompa momaka yehyekat chikawak, mo'ahkokiyaya in at wan kahkalakiyaya pa in barkit, wan yok temtiyaya. <sup>38</sup>Wan Yehshwa koshtikatka pa ikwitap barkit motitsontitikatka se tetsonteyamanke; ki'ishiltik kitsatsilik:

—Tamashtini! Amo titishtatsot kampa tipolaktiyal?

<sup>39</sup>Kwakin omokets oki'ahwa in yehyekat; wan kili in we'atTemtik:

—Amo shinawatitiyak! Haniman walmoyolsewik!

Wan amo molin in yehyekat, wan in we'atTemtik yahmo mo'ahkokiyaya.



*Yehshwa kiyolse in yehyekat pa  
in we'atTemtik (Markus 4:39)*

<sup>40</sup>Kwakin Yehshwa kinmili:

—Pates anmomaptitikatkaloya? Amo nishneltokal newal?

<sup>41</sup>Yehwante hyero momaptitikatkaloya, mo'ilitikatkaloya sek ka oksek:

—Ak aso in yewal takat, yewal kineltokal in yehyekat wan in we'atTemtik?

**Yehshwa kinkishtiliya myak yehyekatim tawalilom**

**se takat pa in tal Gadara**

(Mt. 8:28-34; Lk. 8:26-39)

**5** <sup>1</sup>Asik pa analko in we'atTemtik, pa tal Gerasa.<sup>f</sup> <sup>2</sup>Kwah okis Yehshwa pa in barkit, mo'ashilti se takat yewal kipiya yehyekat katsak. <sup>3</sup>Mochantiyaya in takat kaha kintapachol mihmihki wan amo'ak kikitskiyaya, pa ki'ilpiskya ka kadena'. <sup>4</sup>Pa myak tonatim ki'ilpiloya ka se yawaltik patawak kina kadena' pa nikshiwam wan niyok nimahwam, ma yok yewal kikohkotonaya kadena' wan amo'ak kimansot. <sup>5</sup>In takat nehnemtinem tsatsitinem pa tahka wan pa yowal, pa tepetLom wan kaha kintapachol mihmihki, niyok motehtewiyaya ka tetelme. <sup>6</sup>Kwah okit wEhka Yehshwa, walmotal motankwakets pa i'ishpa yewal, <sup>7</sup>wan tsatsi chikawak kito:

—Ten tikpi ka newal, Yehshwa, nikonDyos HyeroTakpak? Nimichilis pa tinichilis pa i'ishpa Dyos kampa amo tishkokoltis.

<sup>8</sup>Kampa Yehshwa yok kili:

—Yehyekat katsak, shikis pa'itik in takat!

<sup>9</sup>Yehshwa kitahtanili:

—Kina ti'itok?

Wan yewal kinankili:

—Ni'itok Legyon, kampa tikat myak niyehyekatim tawalilom.

<sup>10</sup>Kitahtaniyaya miyak ka niyol Yehshwa pa amo kintetaniskya okse tal. <sup>11</sup>Amo wEhka katkaloya myak pitsom pa se tepetLom takwatikatkaloya, <sup>12</sup>wan moshte niyehyekatim tawalilom kitahtanilo miyak ka niyol Yehshwa:

—Shitisttake pa in pitsom; shitishmakawilti ma tikalakik pa yehwante.

<sup>13</sup>Kwakin Yehshwa okinmak, kwah kisak in yehyekatim tawalilom pa'itik in takat kalakik pa pitsom. Katkaloya 2,000 pitsom, wan tsikwinik pa se teshkal kaha we'atTemtik, wan ompa kohkonik.

---

*f* 5:1 Gerasa in kinek kitos niyok Gadara.



<sup>14</sup>Yehwante takwitaptikatkaloya pitsom, cholok oyak taketsak pa mochi Wepweblo wan pa mochi tashosholtik. In masewalme okisak pa tachiyaloskya ten opan. <sup>15</sup>Asik kaha Yehshwa, kitak in takat yewal kipiyya niyehyekatim tawalilom, ashka yowatikatka, wan tatakemiltili katka wan kwal mo'ilnamikiya; wan moshte momaptik. <sup>16</sup>Wan yehwante aki kitak, ten okipan in takat yewal kipiyya niyehyekatim tawalilom, kintakichilik kina oye wan kina okinpan in pitsom. <sup>17</sup>Kwakin miyak kitahtanilo ya Yehshwa pa yaskya pa okse tal.

<sup>18</sup>Kimani Yehshwa tehko pa in barkit, in takat yewal takishtilil niyehyekatim tawalilom kitahtani pa mokawaskya inak yewal. <sup>19</sup>Ma yok Yehshwa amo okikawil, kili:

—Shi kaha timochanti, ka moparyente, wan shikintakichil mochi in ten TATS okichi ka tewal.

<sup>20</sup>In takat opanoti, wan taketstinem mochi pa in MatahtiPweblo's yewal ten okichi Dyos pa yewal; wan moshte motapololtilo ya.

**NikonSiwatPiltonte Ya'iros wan in siwat yewal  
kikitski nitakemtel Yehshwa  
(Mt. 9:18-26; Lk. 8:40-56)**

<sup>21</sup>Wan Yehshwa omokwep oksep pa barkit pa analko in we'atTemtik, monichikok kiyawalok myak masewalme, yok omoka pa itenko in we'atTemtik. <sup>22</sup>Kwakin owal se takat itoka Ya'iros; yewal wetatakewan pa in tyopYudiyo, okit Yehshwa, motankwakets pa nikshiwam <sup>23</sup>kitahtani miyak, kiliyya:

—Nokon siwatPiltonte mikti; Shiwal shiktal momahwam pa yewal, pa pahti wan pa yolis.

<sup>24</sup>Oy inak Ya'iros, wan kitokatiyalo ya Yehshwa myak masewalme, wan kitilinilo ya. <sup>25</sup>Ompa katka se siwat kipewaya se kokoliste, ka 12 shiwim kisaya yEste. <sup>26</sup>Panotikatka miyak takokoliste kichiwilik myak tapahtinilme, ki'ihentakowaya nitomi mochi kishki kipiyya, han amo'ak okipahti. <sup>27</sup>Kwah kimat kina taketsaloya ka Yehshwa, o'as takwitap ika masewalme, wan okikitski pa nishashal. <sup>28</sup>Wan mo'iliiyaya pa'itik yewal: “Ta nihkitski-skya nitakemtel, kwakin yok nipahtiskya.” <sup>29</sup>Haniman wak niyEste, kimat pa'itik ikwerpo kampa opahti. <sup>30</sup>Yehshwa

haniman okimat kampa pa newal okis chikawaliste;  
omomalin okinmit myak masewalme wan kinmili:

—Ak okikitski notakemtel?

<sup>31</sup>Nimoneshtililme kilik:

—Tikinmitatik kina in myak masewalme mishtilintikat wan titahtani: “Ak nishkitski?”

<sup>32</sup>Ma yok, yewal omoka tachishti pa kitaskya ak yok oki-chiwil. <sup>33</sup>Kwakin in siwat momaptitikatka, moyoyokatikatka, kampa kimat ten kipanotikatka pa'itik ikwerpo, mo'ashilti, omotankwakets pa ni'ishpa Yehshwa, wan kili mochiten yewal kipanotikatka. <sup>34</sup>Wan Yehshwa kili:

—NonohniSiwat, ashka otipahti kampa otiktal motanel-tokaliste ka newal. Shiyapti ashka ka sewiliste, wan timoka tapahtil.

<sup>35</sup>Ayamo'ok tamiyaya tahtowaya Yehshwa, kwah walak yehwante katkaloya pa nikal wetatakewan pa in tyopYudiyo wan kilik:

—Pates tikilitik in tamashtini; kampa omik mokonsiawat?

<sup>36</sup>Yehshwa, amo kinkak in yewal ten kitoloya, wan kili wetatakewan pa in tyopYudiyo:

—Amo shimomapti; shiktal motaneltokaliste ka newal.


<sup>37</sup>Wan amo kinek kinnosti moshte hanwel Petros, Yakobo wan Yuhanes, ninohni Yakobo. <sup>38</sup>Asik pa nikal ka wetatakewan pa in tyopYudiyo, Yehshwa okit kina hyero mochiwaloya, chokatikatkaloya wan tsatsiloya. <sup>39</sup>Okalak wan kinmili:

—Pates anchokatikat wan antsatsitikat? Amo mihki in siwatPiltonte, hanwel koshtik.

<sup>40</sup>In masewalme kiwetskililoya yewal. Otatake pa kisalloskya moshte, okalak inak nitats wan ninantsi wan yehwante walaloya inak yewal, kaha katka in siwatPiltonte. <sup>41</sup>Okikitski nimahwa in siwatPiltonte, wan kili:

—Talita, kumi —yewal kinek kito: SiwatPiltonte, nimichili, shimokets.

<sup>42</sup>Wan haniman onehnem in siwatPiltonte, yewal kipiyya 12 shiwim, omokets wan hani onehnem. Wan in masewalme miyak momaptik. <sup>43</sup>Ma yok Yehshwa okintake pa amoten kito-loskya amo'ak, in ten opan wan okintake pa kitamakaloskya in siwatPiltonte.



© 1996 David C. Cook

*Yeshwa kiyolti nikonSiwat itoka Ya'iros. (Markus 5:43)*

### **Yeshwa pa Nasaret**

(Mt. 13:53-58; Lk. 4:16-30)

**6** <sup>1</sup>Yeshwa omokwep pa nital kaha omo'apa, yaloya niyok nimoneshstililme. <sup>2</sup>Kwah mo'as in tonatmosewilyudiyo, tamashtiyaya pa in tyopYudiyo. Wan in myak kikaktikatkaloya, motapololtiloya wan kitoloya:

—Kampa omoneshtil mochi in taneshstiliste? Ten tamatiliste yewal kipi, wan kinchi taneshstiliste ka chikawaliste ka nimahwam? <sup>3</sup>Amo in se karpintero, nikon Marya wan ninohniwan Yakobo, Yosé, Yudas wan Shimón, amo niyok inik mochantil ninohniwanSiwam pa in pweblo.

Wan amo kinekik kikakik. <sup>4</sup>Wan Yeshwa kinmili:

—Se niTaketsal nitahtolDyos kimawishtilil masewalme, ma yok amo kimawishtilil yehwante pa nital, wan ika niparyente wan ninohniwan pa icha.

<sup>5</sup>Wan ompa amo okichi se taneshstiliste, hanwel okintalil nimahwam pa sek kokoshkim wan okinpahti. <sup>6</sup>Wan motapolol-tiya Yeshwa ompa yehwante amo kinekik kineltokak. Yawiya pa ranchito' amo wEhka, kinmashtiyaya.

**Yeshwa kintitani in 12 nimoneshstililme pa  
tamashtiloskya wan yaptinem pa oksek pweblo'  
tihtipichim ompa tamashtiyaya amo wEhka**

(Mt. 10:5-15; Lk. 9:1-6)

<sup>7</sup>Kwakin okinnots in 12 nimoneshstililme, wan ompa okintake pa yaloskya ka ohome, okinmak chikawaliste

pa kinkishtililoskya yehyekatim tawalilom. <sup>8</sup>Wan kinmili amo shihwikak amoten pa ot, hanwel se bordon. Amo shihwikak wangoch, nipan, nitomi. <sup>9</sup>Niyok kinmili shiktalik anmowarachim wan amo shihkwikak ome shashalme. <sup>10</sup>Kinmili:

—Kimani asiske pa se kal, ompa shimokawak pa mochi tonatim pa kimani kisaske. <sup>11</sup>Ta yehwante pa in pweblo amo anmishnamikil wan amo kinekil anmishkakiske, kwakin haniman shikisak ompa shimotsehtselok nipohtiTal pa mo'ikshiwam, yok kimatiske kina kichiwilitikat Dyos ten amokwal. Annimichili melak, pa in tonat Dyos kintakokoltis amoyok miyak panoske takokoliste yehwante pa in Wepweblo, Sodoma wan in Wepweblo Gomora.

<sup>12</sup>Yok kisak in 12 nimoneshtililme, pa kintakichilil nitanawatilisteDyos pa kikwepaloskya ininyolme. <sup>13</sup>Niyok kinkishtililoya yehwante myak niyehyekatim tawalilom, niyok myak kokoshkim kinshawililoya aseyte wan kinpahtiloya.

### **Kimiktil Yuhanes yewal takwateki**

(Mt. 14:1-12; Lk. 9:7-9)

<sup>14</sup>In weRey itok Herodes Antipas kimat, ten kichiwaya Yeshswa. Kampa ni'itokaliste moshte kitaketsaloya kina katka yewal sek kililoya:

—Yeshswa katka Yuhanes yewal takwateki oksep wal-yoliya, kampa yok kipi chikawaliste yewal kichiwaya myak taneshtiliste.

<sup>15</sup>Oksek kililoya:

—Yewal EliYah.

Wan oksek kililoya:

—Yewal se ka niTaketsal nitahtolDyos yewal yoliwiya ya wehka.

<sup>16</sup>Kwah okikak Herodes, kito:

—In yewal Yuhanes, yewal newal onitatake pa kikotonililoskya nikich, kampa yewal oyol oksep.

<sup>17</sup>Yuhanes oki'ahwa Herodes, kampa okonan Herodyas yewal ye nisiwa Pilipos wan Pilipos, ye ninohni Herodes, kwakin Herodes otatake pa kikitskiloskya Yuhanes, pa kitsakwaloskya wan pa ki'lipiloskya ka kadena'. <sup>18</sup>Kampa Yuhanes kiliyaya Herodes:

—Ma yok amokwal pa tikonanas nisiwa monohni.

<sup>19</sup>Ma yok Herodyas, okwalan ka Yuhanes kinekiya kimiktiskya, ma yok amokwal kina kimiktiskya; <sup>20</sup>kampa Herodes kimawishtiliyaya Yuhanes kimatiya kampa katka se takat kwal kipiyyaya niyol chipawak, yewal mochantiyaya kina Dyos nitamashtiliste. Kimani kikakiyaya Herodes, kina taketsaya Yuhanes amo kimatiya ten kichiwaskya ma yok kikakiyaya kwal kampa niyok kipalewiyyaya. <sup>21</sup>Kwakin o'as in tonat kimani Herodyas, okit kina kimiktiskya Yuhanes in tonat kampa omonamik kwah otakat Herodes, okinnots pa takwaloskya yehwante wehwe monotsalme wan wehwetatakewalme wan niwehwe gwacho' pa in Galileya. <sup>22</sup>Takwatikatkaloya okalak nikonSiwat Herodyas wan ompa omitot, yok okinmak pakiliste Herodes wan yehwante ompa katkaloya. Kwakin in weRey Herodes kili in siwat:

—Shinishtahtan ten tihnekis, wan newal nimishmakas.

<sup>23</sup>Wan kili tahtol melawak newal nimishmakas ten tinishtahtanis, ta tinishtahtan notahko ka noreynaroliste.

<sup>24</sup>Okis in siwatYankwik, kili ninantsi:

—Ten kwal niktahani?

Wan ninantsi kinankili:

—Shiktahtan nitsontek Yuhanes yewal takwateki.

<sup>25</sup>Haniman ka isewiliste in siwatYankwik okalak kaha katka weRey Herodes, wan kili:

—Nihnek pa tinishmakas ashkit nitsontek Yuhanes yewal takwateki pa se tapalkat.

<sup>26</sup>Kwakin kikok niyol in weRey; yok kina kili in siwat ka nitahtol amo kinek kikwep yewal ten kili pa i'ishpa yehwante wehwe tatakewaloya. <sup>27</sup>Yok okitake in weRey se nigwacho, kili shinishwalikil itsontek Yuhanes. <sup>28</sup>In gwacho oy kaha katka tatsakwal Yuhanes, kikotonil nitsontek wan okiwick pa se tapalkat. Okimak in siwatYankwik, wan yewal okiwickil ninantsi.

<sup>29</sup>Kimani nimoneshtililme Yuhanes kimatik in, oyak konanak ikwerpo pa kitapacholoskya.

### **Yehshwa kintamakaya 5,000 masewalme**

(Mt. 14:13-21; Lk. 9:10-17; Yh. 6:1-14)

<sup>30</sup>Inik 12 tatitanilme monichikok ka Yehshwa wan kitakichilik mochten okichiwak, wan in ten kinmashtik. <sup>31</sup>Kwakin Yehshwa kinmili:

—Ma tiyak pa oksela kaha amo'ak onka, ompa timosewiske tipit.

Kinmili kampa yaloya wan walaloya myak masewalme, kampa amokwal kina takwaloskya. <sup>32</sup>Yok oyak pa se barkit kampa amo'ak katka. <sup>33</sup>Ma yok myak kinmitak kimani oyak yehwante, wan ki'ishmatik, kwakin kisak pa mochi inik Wehwepweblo', haniman motalotiyak, asik kwah ayamo'ok asiyaya. <sup>34</sup>Kwah Yehshwa okis pa in barkit, okinmit myak masewalme wan kinihnil, kampa katkaloya kina borrego' yewal amo'ak kinkwitawiyaya; haniman miyak okinmashti. <sup>35</sup>Kwah tamalinti tonat, walak nimoneshtililme ka yewal wan kilik:

—Hyero ya tyotak, kampa nika amoten onka. <sup>36</sup>Shikintake ma yayak pa tashosholtik wan inik ranchito' pa mokowiliske ten kikwaske.

<sup>37</sup>Yewal kinnankili:

—Anmehwante shikintamakak.

Kitahtatanilik:

—Tikpiyaloskya pa titikipanoskya pa myak mestim pa yok tikpiyaloskya myak tomi pa titakowaloskya takwal pa moshte masewalme?

<sup>38</sup>Yehshwa kintahtanili:

—Kishki pan ankipiyal? Shiyak shikitak.

Kwah kimatik kishki, kwakin kilik:

—Makwil pane' wan ome michim.

<sup>39</sup>Kwakin kinmili in masewalme pa mosewiloskya wan monechikoloskya ka tihtipitot ka se wan oksek ompa pa in sakat shosholtik; <sup>40</sup>yok monichikok yehwante wan motalik ka myak tanichikolme sek ka 100 oksek ka 50 takam. <sup>41</sup>Wan Yehshwa okonan in makwil pane' wan in ome michim, otachi pa ilwikak, kimashtiyaya haniman kitahtapan tatahtahko, wan okinmak nimoneshtililme pa kinmakaloskya masewalme. Wan niyok kinmak tahtahko in ome michim ka moshte. <sup>42</sup>Yok moshte takwak wan pachiwik; <sup>43</sup>kinichikok mochi inik tahtahko ka michim kishki amo kikwak, kintemiltik 12 chikiwim. <sup>44</sup>Katkaloya 5,000 takam yehwante kikwak pane'.

### Yehshwa nehnemiyaya ipa we'atTemptik

(Mt. 14:22-27; Yh. 6:16-21)

<sup>45</sup>Haniman Yehshwa kinmili nimoneshtililme pa tehkoloskya pa in barkit niyok kinmil kampa panoloskya pa BetSayda yewal katka analko in we'atTemptik, wan yewal omoka

kinmiliti in masewalme ma yayaptiyak pa ninicha. <sup>46</sup>Kwah otam okintitan moshte, oy Yehshwa pa in tepetLom ompa Dyos kitahtaniyaya. <sup>47</sup>Kwah tapohpoyaptiyaya, wan katka in barkit ipanta in we'atTemtik, wan mokawaya Yehshwa isel pa tal. <sup>48</sup>Wan kinmitaya Yehshwa nimoneshstililme kampa hyero siyaptikatkaloya kitaneloltitikatkaloya in barkit, kampa kinnamikiyaya in yehyekat chikawak, tahtanesti Yehshwa owal ka yehwante nehnemiyaya ipa we'atTemtik, mochi kina kinpanawiskya. <sup>49</sup>Kwah kitak yewal nehnemiyaya pa in we'atTemtik, tamatiloya kampa katka se tamaptiliste wan kipewaltik tsatsiliste; <sup>50</sup>kampa moshte kitatikatkaloya wan momaptitikatkaloya. Ma yok kinnots Yehshwa kinmili:

—Shikchikawaltik anmoyol; amo shimomaptik newal ninewal!

<sup>51</sup>Tehko pa in barkit ka yehwante, in yehyekat moyolse; wan nimoneshstililme mokawak tachishtikat. <sup>52</sup>Kampa yehwante amo kimatiloya takakiloya wan ayamo'ok kimatiloya kikakiloya kina opan, ompa kaha kinmakaya tahtahko in pan.

### **Yehshwa kinpahti myak kokoshkim pa in tal Genesaret**

(Mt. 14:34-36)

<sup>53</sup>Kwah panok in we'atTemtik asik pa in tal itok Genesaret, wan kilpik in barkit pa itenko in we'atTemtik. <sup>54</sup>Kwah kisak pa in barkit, wan haniman in masewalme ki'ishmatik Yehshwa. <sup>55</sup>Yok nehnemtinem pa moshte yehwante ompa mochantiloya, kinwalikilik in kokoshkim pa tapeshtim, kimatik kaha katka Yehshwa. <sup>56</sup>Kaha han kalakiyaya yewal, pa ranchito', pa Wehwepweblo' pa tashosholtik, kintaliloya in kokoshkim kaha mosewiloya wan panoloya masewalme kitahtaniLOYA ka ininyolme Yehshwa pa kinmakawaltiskya pa kikitskiloskya hanwel itenko nishashal; wan moshte yehwante kishki kikitskiloya, mokawaloya tapahtilme.

### **Ten ki'ihitako se masewal**

(Mt. 15:1-20)

**7** <sup>1</sup>Wan walak kaha katka Yehshwa in parisheyo', wan sek Tamashtinilme NitanawatilMoshé walaloya pa Yerushalém. <sup>2</sup>Kitak kina sek nimoneshstililme takwaloya ka ininmahwam kahkatsak, kinek kito, amo mopakalme. <sup>3</sup>Inik parisheyo' wan moshte yudiyo' kichiwal, amo takwal ta ayamo mopakal ininmahwam yok kina kimatiloya kichiwaloya inik

ininwichalme. <sup>4</sup>Wan ta han yal takowal wan tanamakal, kimani walmokwepal pa ininicha, amo takwal ta ayamo mopakal yok kina kimatiloya kichiwaloya, wan kat oksek myak taneltokaliste yewal kintemakak ininwichalme, in yudiyo' kipiwal oksek tachiwaliste, kinpakal inik baso', komim wan komim wehwe ka tayokshutil tatsilinilme wan tapeshtim.

<sup>5</sup>Kwakin inik parisheyo' wan Tamashtinilme NitawawatilMoshé kitahtanilik Yehshwa:

—Pates amo kichiwal momoneshtililme yok kina kimatiloya kichiwaloya towichalme, kampa takwal ka ininmahwam kahkatsawak?

<sup>6</sup>Yehshwa kinnankili:

—Ome ininshayak kwal kitowaya YeshaYah kimani kimashtiyaya nitahtolDyos inak mehwan:

Inik masewalme tamawishtilil kina kitol ka in kamak, wan melak ka inyol amo nishmawishtilil.

<sup>7</sup>Motankwaketsal hanya han,

kampa tamashtil kina nitahtolme masewalme.

<sup>8</sup>Kampa anmehwan ankikawal nitamashtilisteDyos wan amo ankikawal pa ankichiwaske in taneltokaliste yewal kikwihkwilok takam ya wehka: kina tapakaliste komim wehwe wan tihtipichim, wan myak oksek taneltokaliste.

<sup>9</sup>Niyok kinmili:

—Kwal anmoneshtilik kina amo kinekil nitamashtilisteDyos kampa yok ankinpiyal anmotaneltokaliste. <sup>10</sup>Amo anki-chiptikat kwal kampa Moshé kito: “Shikintasot motats wan monantsi,” “Niyok kito ak kihwehwekalti nitats wan ninantsi, ma mik.” <sup>11</sup>Ma yok anmehwan ankilil kampa ta se takat kili nitats wan ninantsi: “Amo animishpalewis ka notomi wan mochi yewal ten yes tasot in Korbán” (Korbán kinek kili, kampa notemakalisteDyos); <sup>12</sup>kwakin yok, anmehwan yahmo ankimakal pa ankinpalewis nitats wan ninantsi.

<sup>13</sup>Yok ankichiwal, wan yok anmehwan yahmo kimawishtilil nitahtolmeDyos ka anmotamatiliste in tamatiliste anmishtemakak ya wehka inik takam, wan anmehwan ankitemakak anmopilwam in tamatiliste. Niyok kat myak oksek tamatiliste kina inik ankinchiwal.

<sup>14</sup>Oksep Yehshwa okinnots in masewalme, kinmili:

—Shinishkakik moshte, wan shihmatik in ten kinek kitos:

<sup>15</sup>Amoten yewal ten kikwa se, yewal ki'htako. Yewal ten kis



pa niyol se yewal ki'ihitako. <sup>16</sup>Aki kipi ninakas, ka takakis, shitakak kwal.

<sup>17</sup>Kimani Yehshwa panoti ka in myak masewalme okalak pa kal, nimoneshtililme kitahtanilik ten kinek kitos in tapowalite. <sup>18</sup>Yewal kinmili:

—Niyok amo ankimatil anmehwante ten kinek kitos? Amo ankimatil kampa mochi yewal kikwa se, amo ki'ihitako, <sup>19</sup>amo kalaki pa ininyol, kalaki pa itik ikwerpo kwakin kis kimani mapits?

Ina kitowaya Yehshwa kampa moshte takwalme kwal pa kikwaloskya. <sup>20</sup>Niyok kinmili:

—Ten hanwel yewal kis pa niyol se takat, yewal ki'ihitako. <sup>21</sup>Kampa pa'itik ininyol inik takam amo kwahkwalmes kisas inintamatiliste, inik amo tasiyawatilme<sup>h</sup> motekal sek ka oksek, in ta'ishtikiyanilme, wan in tamiktilme, <sup>22</sup>inik tasiyawatilme motekal sek ka oksek, kinektiyaske mochten, kichiwal ten amokwal, takwahkwamanal, amo kimatil pinawal ka inintachiwaliste amo kwahkwalmes, kinkokolitiyaske, takwahkwamantiyaske, mopantilitiyaske, wan amo mo'ilnamiktiyaske. <sup>23</sup>Mochi inik kisas pa'itik, ininyol se ki'ihitako niyol takat.

### Nitaneltokaliste in siwat SiroPoynikya

(Mt. 15:21-28)

<sup>24</sup>Kwakin okis Yehshwa ompa, oy pa tal Tiros wan Tsidón. Ompa okalak pa se kal amo'ak kinek pa kimatiskya; kampa ompa katka ma yok amokwal kina motatiskya. <sup>25</sup>Ompa katka se siwat kipiyyaya se nikonSiwatPiltonte kipiyyaya se yehyekat tawalilot; otakak in siwat kina tapahtiyaya Yehshwa, wan haniman owal okit, omotankwakets pa nikshiwam. <sup>26</sup>In siwat otakat pa SiroPoynikya wan tahtowaya gereka. Kimashtiyaya Yehshwa pa kikihtiliskya niyehyekat tawalilot siwatPiltonte. <sup>27</sup>Yehshwa kili:

—Ta'ishpa ma takwak topilwam pa pachiwiske. Amokwal tikinkishtiliske in yewal kikwal topilwam pa tikinmakaske pa kikwaske chichim.

<sup>28</sup>Wan in siwat kili:

---

<sup>h</sup> 7:21 Adulterio in kinek kitos: ta se takat wan ta se siwat kat tasiyawatilme wan motekal ka yewal amo nitaka wan amo nisiwa.

—Haha, TATS; ma yok yewal wetsi tahtahko itsinta in kaha takwal topilwam yewal chichim kikwal.

<sup>29</sup>Yehshwa kili:

—Hanwel kwal in yewal tikito; kampa shimowik. Ashka okikis niyehyekat tawalilot mokon.

<sup>30</sup>Kwah o'as in siwat pa nikal, okit in siwatPiltonte pa nita-peshte, yahmo kipiyya niyehyekat tawalilot.

**Yehshwa kipahti se yewal amo takakiya wan amo tahtowaya**

<sup>31</sup>Okis Yehshwa pa in tal Tiros, wan panoti pa Tsidón iten-ko in we'atTemtik pa Galileya, kaha katkaloya MatahtiPweblo'.<sup>i</sup>

<sup>32</sup>Kiwalikilik se takat yewal amo takakiya wan amowel tahtowaya kwal, wan kilik: Kitahtanilo ya pa kitaliliskya nimahwa pa yewal. <sup>33</sup>Kwakin Yehshwa okiwik, kaha amo katkaloya masewalme in takat yewal amo takakiya, okikalakti Yehshwa inindedo' pa moshte omente ninaka in takat, kishashawil nichihchal pa nilengua in takat. <sup>34</sup>Kwakin tachi pa in takpakllwikak, mihyot, kito:

—Hepata! —yewal kinek kito: Ma motap!

<sup>35</sup>Haniman, mo'ishtapok ninakaswam, momaka nilengua wan okipewalti tahtoliste kwal. <sup>36</sup>Okinmil Yehshwa pa amo tanawatiloskya; ma yok miyak kintahtan, se wan oksep ma yok yehwante kitaketstinemil miyak. <sup>37</sup>Wan in masewalme motapoltilo ya miyak, kitoloya:

—Yewal mochi kwal kichi; yehwante amo takakiloya kintakakilti wan aki amo tahtoloya ashka yehwante tahtol.

**Yehshwa kintamakaya 4,000 takam**

(Mt. 15:32-39)

**8** <sup>1</sup>Pa in tonatim monichikok oksep myak masewalme, wan amo kipiyaloya ten kikwaloskya. Okinnots Yehshwa nimoneshtililme kinmili:

<sup>2</sup>—Nikinihnili in masewalme kampa kipiya yey tonatim tonawak wan ashka amo kipiya ten kikwaske. <sup>3</sup>Sek walal wEhka ta nikintitan ka mayanaliste pa ininkal, amo kipiya-ske chikawaliste pa in ot.

<sup>4</sup>Kinankilik nimoneshtililme:

—Kina kwal tikintamakaske amo'ak mochanti nika?

<sup>i</sup> 7:31 DekáPolis in kinek kitos: matahtiPweblo.

<sup>5</sup>Yehshwa kintahtanili:  
 —Kishki pan ankipiyal?  
 Yehwante kinankilik:  
 —Chikome.

<sup>6</sup>Kwakin Yehshwa kintake pa motaliloskya talpa, okinonan in chikome pane' kimak tashtawiliste Dyos. Okinmak tahtahko' nimoneshtililme pa yok yehwante kinmakaloskya masewalme, yehwante yok okichiwak. <sup>7</sup>Kinpiyaloya niyok sek michitito', yok Yehshwa kinmashtiyaya, wan kinmili niyok nimoneshtililme pa kintalililoskya ininishpa pa kikwaloskya. <sup>8</sup>Takwak wan pachiwik. Kwakin kinpehpenak inik tahtahkito' kinichikok chikome chikiwim. <sup>9</sup>Yehwante kishki takwak katkaloya 4,000 masewalme. Kwakin kinmili Yehshwa pa mokwepaloskya, <sup>10</sup>Yehshwa wan nimoneshtililme tehkok pa se barkit, oyak pa tal Dalmanuta.

**Sek parisheyo' kitahtanilo ya se taneshtiliste  
 ka nichikawaliste Dyos**  
 (Mt. 16:1-4; Lk. 12:54-56)

<sup>11</sup>Walak kitak Yehshwa sek parisheyo' wan okipewaltik kwalaniliste ka Yehshwa. Shikchi se nitanishtiliste Dyos pa



© 1996 David C. Cook

*Moneshtililme kintamakal 4,000 masewalme (Markus 8:8)*

yok kikitskiloskya, kitahtanilo ya taneshtiliste pa in ilwikak.

<sup>12</sup>Yehshwa wehwe mihyoti kwah kinmili:

—Pates pa inik shiwim inik takam tahtanil se taneshtiliste? Annimichilis melak amo nesis se taneshtiliste ka chikawaliste.

<sup>13</sup>Okinka, omokwep okalak pa in barkit, panoti pa analko in we'atTemtik.

**Yehshwa kintakechili ika motaposhawaltil in parisheyo'**

(Mt. 16:5-12)

<sup>14</sup>Nimoneshtililme ki'ilkawak pa kiwikaloskya ten kikwaloskya, kipiya lo ya se pan pa in barkit.

<sup>15</sup>Yehshwa kinmili ka tahtolme:

—Shimokwitawik ka nitaposhawaltiliste parisheyo' wan ka Herodes.

<sup>16</sup>Yehwante mo'ililoya:

—Yewal yok kitotik kampa amo tihwalikak ten tikwaske.

<sup>17</sup>Yehshwa okimat ten mo'ilitikatkaloya, kinmili:

—Pates anmokwalantitikat kampa amo ankipiyal ten ankikwaske? Ayamo'ok ankitalil pa anmotsontek wan ayamo anmishasi pa anmoyol in yewal nihnek annimishmashti? Amo ankinakil ankimatiske ten kinek kili notahtolme? <sup>18</sup>Ankinpiyal anmoshtololme, amo antachiyal? Ankinpiyal anmonakam amo antakakil? Amo anki'ilnamikil? <sup>19</sup>Kwah nikinmak tah-tahko in makwil pane' ka in 5,000 takam, kishki chikiwim ankintemiltik ka tahtahkito' yewal amo kikwak?

Yehwante kinankilik:

—(Dose) 12.

<sup>20</sup>—Kimani nikinmak tahtahko in chikome pane' ka in 4,000 takam, kishki chikiwim ankinnichikok wan ankintemiltik ka tahtahkito?

Yehwante tanankilik:

—Chikome.

<sup>21</sup>Kwakin kinmili:

—Ayamo ankimatil ten annimishmashtitik?

**Yehshwa kipahti se amo tachiyaya pa BetSaida**

<sup>22</sup>Kwah asik pa BetSayda; sek masewalme kiwikak kaha Yehshwa se takat amo tachiyaya, kitahtanilo ya pa kikitskiskya.

<sup>23</sup>Kwakin Yehshwa okikitski pa nimahwa, okikishti kiyawak pa in ranchit. Ompa kishashawil nichihchal pa nishtololwam,

okitalil nimahwam pa yewal wan kitahtanili: Tikit ten. <sup>24</sup>Tachi in yewal amo tachiyaya, wan kito:

—Nikinmit masewalme. Nikinmit kina kwawim, yewal nehnemil.

<sup>25</sup>Oksep okital Yehshwa nimahwam pa nishtololwam, wan ashka tachiyaya kwal, kampa pahtik nishtololwam, wEhka tachiyaya mochiten kinmitaya. <sup>26</sup>Wan Yehshwa okitake pa yaskya pa nikal, wan kili:

—Amo shikalak pa in ranchit, wan amo'ak shikil amoten ompa.

**Petros kito kampa Yehshwa onka yewal Dyos okitake**

(Mt. 16:13-20; Lk. 9:18-21)

<sup>27</sup>Panotiyak Yehshwa wan nimoneshtililme oyak pa inik ranchito' pa Kaysareya Pilipos. Wan pa ot okintahtanil nimoneshtililme:

—Ten kitol masewalme kampa ak ninewal?

<sup>28</sup>Yehwante kinankilik:

—Sek kitol tewal tiYuhanes yewal takwateki, oksek kitol tewal tiEliYah, wan oksek kitol kampa titewal se niTaketsal nitahtolDyos.

<sup>29</sup>Oksep yewal kintahtanili:

—Anmehwante, kampa ak kitol yewal ninewal?

Petros kinankili:

—Tewal ti'onka in Kristo.

<sup>30</sup>Wan Yehshwa kinmili pa amo'ak kililoskya amoten.

**Yehshwa kinnawati nimikiliste**

(Mt. 16:21-28; Lk. 9:22-27)

<sup>31</sup>Kwakin Yehshwa kinmashtiya nimoneshtililme, in ten kipanoskya in NitakaTakpakIlwikak kipi pa moyolkoltis ka miyak takokoliste mochiten, yes ta'ihyal ka in Abwelolme Wehwetsim, wan TotatsimWehwe wan ka in Tamashtinilme NitanawatilMoshé, wan ma mik wan walyolis kwah panoske yey tonatim. <sup>32</sup>Kinmili ka tahtolme yewal kimatiloya ten kinek kitoskya. Kwakin Petros okiwik isel oki'ahwa pa amoyok kitotiyas kampa yewal mikiskya. <sup>33</sup>Ma yok walmo'ishkwep Yehshwa kinmitaya nimoneshtililme, oki'ahwa Petros kili:

—Shime pano'ishpa!, titahtotik kina Satán!, kampa mota'ilnamikiliste amo ka Dyos, hanwel kina masewalme.

<sup>34</sup>Kwakin okinnots Yehshwa nimoneshstililme wan mase-walme, wan kinmili:

—Ta ak kinek nishtokas, amo kichiwas kina yewal kinek, ma konan nikruskwawit, ma nishtok. <sup>35</sup>Kampa yewal aki kineki kikwitawis niyoliliste, kipolos; wan aki momakawaltis pa kipolos niyoliliste ika newal wan ka noTamashtilistekwal, mokishtilis niyoliliste. <sup>36</sup>Ten kitanis se takat ta motakowil mochiten pa kishki tal ma yok miki kipolo niyoliliste, kwakin ten kipiwas? <sup>37</sup>Kina kwal tashtawas se takat pa oksep kipiwas niyoliliste? <sup>38</sup>Kampa ta ak nishpinawilis pa newal wan ka notahtolme ka inik ta'ihtakolilme, niyok in NitakaTakpakIlwikak kipinawilis yewal kimani walas ka nitawiliste ka niTatsDyos ka nichihchipawak nitanawatilanelme.

**9** <sup>1</sup>Niyok Yehshwa kinmili:

—Melak annimichilis, sek inik yehwante ashka nika kat ankitaske, kina walas nireynarolisteDyos ka chikawaliste ankitaske yehwante ayamo'ok mikil.

**Istayaya taminaya Yehshwa pa ininishpa in  
yey nimoneshstililme**

(Mt. 17:1-13; Lk. 9:28-36)

<sup>2</sup>Panok chikwase tonatim, Yehshwa okinwik Petros, Yakobo wan Yuhanes; tehkok iselte pa tepetLom wan ompa amoyok nesiyya ni'ishpa yehwante. <sup>3</sup>Ompa nitakemtel hyero istayaya wan tipitakaya, amoyok se tapakaliste yeskya pa kishki tal, amo'ak kipakaskya istak kina in. <sup>4</sup>Kwakin nesik EliYah inak Moshé, ka Yehshwa taketstikatkaloya.<sup>j</sup> <sup>5</sup>Kwakin Petros kili Yehshwa:

—Tamashtini, kwal onka kampa tikat nika! Ma tikchiwak yey kalme tachiwalme ka iswat: se pa tewal, okse pa Moshé wan in okse pa EliYah.

<sup>6</sup>Amo kimatiya ten kitotikatka Petros, kampa momaptitikatkaloya in yey monishtililme. <sup>7</sup>Kwakin owal se ayawit okintasowalti, wan pa in ayawit kikakik se tahtol kitowaya:

—In yewal nokon niktasot; yewal shihkaktiyak.

<sup>8</sup>Haniman, momalinak tachiyak, amo'ak kitak Yehshwa han.

---

<sup>j</sup> 9:4 Yehwante in omente yoliloya ya wehka pa in tonatim yewal ayamo takatiyaya Yehshwa nika pa in mochital.

<sup>9</sup>Kimani temotiwaloaya pa in tepetLom, Yehshwa kinmili: Amo'ak shikilik amoten ten ankitak, hanwel kimani NitakaTakpakIlwikak mikiskya wan yoliskya oksep. <sup>10</sup>Ma yok amo'ak taketsaya ka yehwante, motahtanililoya ten kinekiya kioskya kampa mikiskya wan yoliskya oksep. <sup>11</sup>Kwakin kitahtanilik Yehshwa:

—Pates yok tishmashtil inik Tamashtinilme NitawanawatilMoshé kito monek pa walas ta'ishpa EliYah kwakin walas Kristo?

<sup>12</sup>Yehshwa kinnankili:

—Melak pa walas ta'ishpa EliYah, pa takawas kwal pa mochiten. Kina kwakin kito nitakwihkwiloliste in NitakaTakpakIlwikak? Kipi kampa panos miyak takokoliste wan yes ta'ihyaliste. <sup>13</sup>Wan animichilis kampa EliYah ya owal, kampa sek kichiwilik kina ankinetik, kina onka pa takwihkwiloli inak yewal.

**Yehshwa kipahti se piltonte yewal kiyehyekaltitiyaya  
niyehyekat tawalilot**

(Mt. 17:14-21; Lk. 9:37-43)

<sup>14</sup>Kwah asik kampa katkaloya in oksek nimoneshtililme, kinmitak myak masewalme kinyawalotikatkaloya; wan sek Tamashtinilme NitawanawatilMoshé momiktitikatkaloya ka yehwante nimoneshtililme Yehshwa. <sup>15</sup>Kwah, kitak Yehshwa, mokawak tachishtiyak in masewalme wan motalok kitahtalok. <sup>16</sup>Wan Yehshwa kintahtanili:

—Ten ika momiktitikat ka yehwante?

<sup>17</sup>Se takat ka inik masewalme kinankili:

—Tamashtini, onimishwalikil nokon, kipi se yehyekat kampa amo tahto. <sup>18</sup>Kaha yes, in yehyekat kalaki kitaweteki pa tal kitsehtselo, kikis nichihchal ka espom pa ikamak, kahkakitil nitankochowam wan moka kwapistik. Wan nikintahtan momonishtililme pa kikishtiloskya wan amo kikishtilik.

<sup>19</sup>Kinankili Yehshwa:

—Ah, masewalme yewal amo ankineltokal Dyos! Kishki tonatim monek pa niyes ka anmehwante? Kishki tonatim monek pa animishkaktiyas? Shinishwalikilik in piltonte.

<sup>20</sup>Kiwalikilik, kwah in yehyekat okit Yehshwa, haniman okitsehtselo chikawak piltonte, okimaya talpa, momihmilowaya kikis nichihchal ka espom pa ikamak. <sup>21</sup>Wan Yehshwa kitahtanili nitats, kili:

—Kishki tonatim kipi ka in?

Wan nitats kinankili:

—Kwah katka tipichi; <sup>22</sup>pa myak tonatim kimayawiyaya pa teshoshte wan kimayawiyaya pa at, kinekiya kimiktiskya. Ta kwal tikchiwas ten, kwakin shitishihnil shitishpale.

<sup>23</sup>Yehshwa kili:

—Pates tikito, ta kwal tikchiwas ten, ak taneltok mochten kwal panos.

<sup>24</sup>Haniman otsats nitats in piltonte kito:

—Newal nitaneltok; shinishpale kampa amo we notaneltokaliste!

<sup>25</sup>Kwah Yehshwa okinmit kampa monichikotiyaloya myak masewalme, oki'ahwa in yehyekat katsak, kili:

—Tewal yehyekat amo tahto wan amo takak, ashka nimi-chili shikis pa yewal; wan amo shikalak oksep pa yewal.

<sup>26</sup>Kwakin in yehyekat tsatsi, kitsehtselo chikawak in piltonte wan okis, omoka kwapistik kina mihki in piltonte, myak masewalme kitoloya kampa ashka omik. <sup>27</sup>Ma yok okikitski Yehshwa pa nimahwa, wan okikets; wan in piltonte omokets.

<sup>28</sup>Kwah okalak Yehshwa pa in kal, wan nimoneshtililme iselte kitahtanilik kilik:

—Pates tehwan amokwal tihkishtilik in yehyekat?

<sup>29</sup>Wan Yehshwa kinankili:

—Inik niyehyekatim tawalilom ka amoten mokishtili hanwel monek pa kitahtaniske Dyos wan mosawaske pa yok kinkishtiliske.

### **Yehshwa kinnawati oksep nimikiliste**

(Mt. 17:22-23; Lk. 9:43-45)

<sup>30</sup>Kwah kisak ompa, panok pa Galileya. Wan Yehshwa amo kinekiya pa amo'ak kimatiskya, <sup>31</sup>kampa kinmashtiyaya nimoneshhtililme kinmiliyaya NitakaTakpakIlwikak kikitskiske wan kitemakaske ka masewalme, wan kimiktiske; kwah panoske yey tonatim yoliskya oksep. <sup>32</sup>Ma yok yehwan amo kimatilo-loya kikakiloya kina tahtowaya, wan kimakasiloya kitahtanilil-loskya ten kinek kitoskya.

### **Akyewal we yes nimonotsaliste?**

(Mt. 18:1-5; Lk. 9:46-48)

<sup>33</sup>Asik KaparNahum; katkaloya kalitik pa kal, Yehshwa kintahtanili:



—Pates anmo'ahwatiwalaloya pa ot?

<sup>34</sup>Yehwante amo nawatiloya, kampa mo'ahwatikatkaloya pa ot in ak yeskya in we ka yehwante. <sup>35</sup>Kwakin omotal Yehshwa okinnots 12 nimoneshtililme, kinmili:

—Ta se kinek monotsa we ika anmehwante, kwakin ma monots tipichi ka moshte, yewal yes nitikipanol pa moshte.

<sup>36</sup>Wan kikitski se piltonte okital ipanta ka yehwante kina-palo, in kinmili:

<sup>37</sup>—Ta ak kinamiki ka no'itokaliste se piltonte kina in, yok yewal nishnamiktik newal; wan akyewal nishnamiktik newal, yewal amo hanwel nishnamiktik newal, niyok kinamiktik ak onishwaltitan.

### **Yehwante amo tishkokolil, yehwante kat ka tehwane**

(Lk. 9:49-50; Mt. 10:42)

<sup>38</sup>Yuhanes kinankili:

—Tamashtini, tikitak se takat ka mo'itokaliste kinkishtiliyaya niyehyekat tawalilot, wan tehwane tikilik pa amoyok kichiptyas, kampa yewal amo tishtokatiyaya.

<sup>39</sup>Kwakin Yehshwa kito:

—Amo shiktasotilik; kampa amo onka amo'ak yewal kichi se taneshtiliste ka no'itokaliste, kampa amoyok pek nishtaketstinemis. <sup>40</sup>Annimichilis kampa akyewal amo tishkokoli, yok yewal onka ka tehwane. <sup>41</sup>Wan akyewal anmishmakas se shikal ka at pa ankoniske ka no'itokaliste, kampa kat anmehwante in Kristo, melak annimichilis kampa amo ankipoloske nitashtawiliste.

### **Shimokwitawik pa amo anyoliske pa se ta'htakoliste**

(Mt. 18:6-9; Lk. 17:1-2)

<sup>42</sup>'Ta ak kichiwilitik se ta'htakoliste ka in tipichim yewal kipi nitaneltokaliste pa newal, yeskya kwal pa ki'ilpiloskya se metatWe pa nikich in kitasaloskya ipanta we'atTemptik.

<sup>43</sup>Ta momahwa mishchiwili ta'htakoliste, kwakin shihkoton; kwal katka pa yoliliste ka se momahwa, wan amo shikalak ka ome momahwam wan yewal tiyas kaha amoSewiTeshoshte,

<sup>44</sup>kampa inik okwilme kikwal ikwerpo yehwante amo mikil wan niyok amoSewiTeshoshte. <sup>45</sup>Ta mokshi mishchiwili ta'htakoliste, kwakin shihkoton; kwal katka pa yoliliste ka se mokshi wan amo shikalak ka ome mokshiwim wan tiyas

kaha amoSewiTeshoshte, <sup>46</sup>kampa inik okwilme kikwal ikwerpo yehwante amo mikil wan niyok amoSewiTeshoshte. <sup>47</sup>Ta moshtolol mishchiwili ta'htakoliste, kwakin shihkopin, kina kwal katka, ta tewal tikalakiskya ka se moshtolol ka nireynarolisteDyos, ma yok yewal ka ome moshtololwam wan mishtasaske kaha amoSewiTeshoshte, <sup>48</sup>kampa inik okwilme kikwal ikwerpo yehwante amo mikil, wan niyok amoSewiTeshoshte.

<sup>49</sup>'Kampa moshte mopoyawaltiske pa teshoshte. <sup>50</sup>Kina kwal in istat; ma yok ta kipol in istat nipoyak, amo tapoyawaltitiyas, kina kwal mopoyawaltis oksep? Ma ankiptiyak istat pa'itik anmehwante, wan yok anyoliske ka sewiliste sek ka oksek.

**Yehshwa tamashtiyaya ka masewalme yehwante  
tasiyawatilme wan takawalme**

(Mt. 19:1-12; Lk. 16:18)

**10** <sup>1</sup>Ompa okis Yehshwa, oy pa tal Yudaya pa analko in atenko Yordán. Wan oksep monichikotikatkaloya masewalme kaha yewal, wan oksep kinmashtiyaya kina kimat kichiwaya. <sup>2</sup>Kwakin asik sek parisheyo' ka Yehshwa wan pa yok kikitiskiloskya, kitahtanilik ta kwal se takat kikawas nisiwa ka yewal omonamikti. <sup>3</sup>Yehshwa kinankili:

—Ten anmishtake Moshé?

<sup>4</sup>Yehwante kinankilik:

—Moshé kinmakawilti se amatTakwihkwilol ka takawas pa yok kikawas nisiwa.

<sup>5</sup>Yehshwa kinankili:

—Moshé kikwihkwilo nitamashtilisteDyos kampa anmehwante amo ankimatil takakil. <sup>6</sup>Kwah nipewaliste, mochten Dyos, “okichi takat wan siwat”. <sup>7</sup>“Kampa se takat kikawas nitats wan ninantsi motakitskilti inak nisiwa, <sup>8</sup>wan yeske se han inakayo.” Yok in omente yahmo yeske ome, mochiwaske se han. <sup>9</sup>Dyos okichi pa yeske se han, amo kishelo masewal.

<sup>10</sup>Kwah mokwepak pa in kal, nimoneshtililme kitahtaniloaya Yehshwa oksep ika in tahtol. <sup>11</sup>Yehshwa kinankili:

—Ta se okika nisiwa wan mosiyawati inak okse siwat, in kichiptik katsawaliste ika nisiwa ta'ishpa; <sup>12</sup>wan ta se siwat okika nitaka wan omosiyawat ka okse takat, in kichiptik katsawaliste ika nitaka ta'ishpa.

### Yehshwa kinmashti inik piltontim

(Mt. 19:13-15; Lk. 18:15-17)

<sup>13</sup>Kinwalikililo ya Yehshwa piltontim, kampa yewal kintaliliskya nimahwa; wan nimoneshtililme kinahwaloya yehwante kinwalikaloya. <sup>14</sup>Yehshwa okinmit, kina kichiptikatka-loya kwalani wan kinmili:

—Shikinmakawak in piltontim ma walak ka newal, amo shikintsakwilik, kampa nireynaroliste Dyos ka yehwante yok kina nesil piltontim. <sup>15</sup>Wan melak annimichilis, ta se amo



© 1996 David C. Cook

*Inik moneshtililme amo kinmakawal piltontim  
pa asiloskya (Markus 10:13)*



© 1996 David C. Cook

*Yeshwa kinmashti piltontim (Markus 10:16)*

kitali nitaneltokaliste ka nireynarolisteDyos kina se piltonte, kwakin in se amo'ik kalakis kampa reynaro Dyos.

<sup>16</sup>Wan kinnapalowaya mochi inik piltontim, wan okintalil nimahwam ipa yehwante wan kinmashtiyaya.

**Se takat yewal kipiyya miyak tomi taketsaya inak Yeshwa**  
(Mt. 19:16-30; Lk. 18:18-30)

<sup>17</sup>Kwakin okonan ot Yeshwa, walmotalotiwalaya se takat kaha yawiya yewal, omotankwakets pa ni'ishpa kitahtanili:

—Tamashtini kwal, ten monek pa nikchiwas pa nikpiyas noyoliliste yewal amoTamis?

<sup>18</sup>Yeshwa kinankili:

—Pates tinichili kampa newal nikwal? Amo'ak se yok onka kwal, han Dyos. <sup>19</sup>Tewal tihmat nitamashtilisteDyos: “Amo shikonan se siwat tasiyawatil; amo shitamikti; amo shita'ishtikti; amo shikintaketsti; amo shitakwahkwamanti; shiktasot motats wan monantsi.”

<sup>20</sup>In takatYankwik kinankili:

—Tamashtini, pa kimani nikatka nipiltonte nihneltokatiwal wan pa ashka.

<sup>21</sup>Kwakin Yehshwa kitatikatka in takatYankwik okitasot, wan kili:

—Monek pa tikchiwas okse tachiwaliste. Shi, shihnamak mochiten tikpi kwakin in tomi yewal tikonanas shikinmak yehwante amoten kipiwal, yok tikpiyas myak moyashka pa in takpakIlwikak; wan shiwal, shinishtok.<sup>k</sup>

<sup>22</sup>Kwakin hyero tamat in takatYankwik kwah kikak in tah-tolme, moyolkokotiyaya kampa kipiwaya miyak niyashka.

<sup>23</sup>Kwakin Yehshwa momalinaya, tachiyaya kaha katkaloya nimoneshtililme kinmili:

—Kina kital kina aso kwal pa kalakis se takat yewal kipi miyak tomi kaha reynaro Dyos!

<sup>24</sup>Mokahkawak mo'itatikat nimoneshtililme ka nitahtolme; wan Yehshwa kinnankili oksep kinmili:

—Nonihniwan, kina aso kwal kalakiske kaha reynaro Dyos yehwante kitalil nitaneltokaliste pa mochi kishki tapiyal! <sup>25</sup>Aso kwal panoskya se kameyo pa se nishtolol tatsomal, yewal amo kalakiskya se yewal kipi miyak tomi kaha reynaro Dyos.

<sup>26</sup>Wan motapololtiloya nimoneshtililme motahtanililoya se ka okse:

—Kwakin, ak mokishtilis niyoliliste?

<sup>27</sup>Yehshwa kinmitaya, wan kinmili:

—Pa takam amoten kwal, ma amo pa Dyos; ma yok Dyos mochiten kwal kichiwas.

<sup>28</sup>Kwakin Petros kili:

—Shikit, tehwanke tihkawak mochiten yewal tikpiyaloya, wan timishtokak.

<sup>29</sup>Yehshwa kinnankili:

—Melak annimichilis, in masewal yewal kikawayaya nikal, ninohniwanTakam, ninohniwanSiwam, nitats, ninantsi, ininpilwam, ininkwahmilme, kampa taneltokal pa newal wan pa in tamashtilisteKwal, <sup>30</sup>pa in yoliliste kipiwas tashtawaliste 100 pa sesen, in kalme, ninohniwanTakam, ninohniwanSiwam, ninantsitsi, ininpilwam, ininkwahmilme, kwah kitohtokaske kikokoliske. Pa inik tonatim yewal walal kipiwas yoliliste yewal

---

<sup>k</sup> 10:21 In amatTakwihkwilolme, kinkwihkwilot takwitap kitalik “wan shihmam mokruskwawit.”

amoTamis. <sup>31</sup>Myak in kishki ashka we monotsalme, yeske monotsalme tipichim; wan kishki ashka monotsalme tipichim, yeske we monotsalme.

### **Oksep Yehshwa kinmili nimikiliste**

(Mt. 20:17-19; Lk. 18:31-34)

<sup>32</sup>Yaloya pa in ot, takistiyaloya pa Yerushalém, Yehshwa yawiya ta'ishpa wan yehwante motapololtiloya wan yaloya ka miyak tamaptiliste. Kwakin okinwik Yehshwa inak yewal iselte inik 12 nimoneshstililme, kipewalti ten yewal kipanós.

<sup>33</sup>Shikitak:

—Titakiskaske pa Yerushalém, wan NitakaTakpakIlwikak kitemakaske ka in TotatsimWehwe wan ka in Tamashtinilme NitanaawatilMoshé, kiteshpawiliske kimiktiske kwakin kitemakaske ka yehwante amo yudiyo'. <sup>34</sup>Yehwante kiwetskiliske wan kiwitekiske wan kichihchaske, wan kimiktiske. Kimani panos yey tonatim, yolis oksep.

### **Yakobo wan Yuhanes kitemachililoya**

(Mt. 20:20-28)

<sup>35</sup>Kwakin Yakobo wan Yuhanes ininpilwam SebadYah, asik kaha Yehshwa, kilik:

—Tamashtini, tihnekil pa titishchiwilis se yewal timishtahtaniske.

<sup>36</sup>Yehshwa kintahtanili:

—Ten ankinekil pa annimishchiwilis?

<sup>37</sup>Yehwante kinankilik:

—Shitishkawil in tonat kimani tireynarotiyas ka tawiliste pa timotaliske, se ka momahwakwal wan okse pa momahwamapoch.

<sup>38</sup>Yehshwa kinmili:

—Anmehwante amo ankimatil ten antahtantikak. Anmochikawal ankoniske nihugoUba chichik yewal newal nikonis, anmokwatekiloskya ka in takwatekiliste ka in yewal newal nimokwatekis?

<sup>39</sup>Yehwante kinankilik:

—Tehwante tikchiwaske.

Yehshwa kinmili:

—Melak, ankoniske nihugoUba chichik, yewal newal nikonis wan niyok takwatekilme ka in takwatekiliste yewal newal ka nimokwatekis; <sup>40</sup>ma yok aki motalis pa

nomahwakwal wan pa nomahwamapoch, amo newal nikinonanas, Dyos kinonanas pa motaliske ompa.

<sup>41</sup>Kwah takakik in oksek matahti, kwalanik ka Yakobo wan Yuhanes. <sup>42</sup>Kwakin Yehshwa okinnots, wan kinmili:

—Anmehwante ankimatil, inik tatakewalme pa in mase-walme kichiwal kina kinekil, wan wehwetatakewalme kipiwal chikawaliste pa kinchiwaltiske takam. <sup>43</sup>Ma yok amoyok yes ka anmehwante. Akyewal kinekiskya pa mochi-was kina in we pa anmehwante, yewal yes anmotikipanol; <sup>44</sup>wan ak yes ka anmehwante ta mochiwaskya in se ta'ishpa, ma yok pa yes nitikipanol ka moshte. <sup>45</sup>Kampa in NitakaTakpakIlwikak amo owal pa kitikipanoliske, hanwel pa kintikipanoli, wan pa temakas niyoliliste pa kinmakawaltis myak.

### **Yehshwa kipahti BarTimayos amo tachiyaya**

(Mt. 20:29-34; Lk. 18:35-43)

<sup>46</sup>Kwakin asik pa in Wepweblo Yerikó. Kwah kistiyaloya pa in Wepweblo Yehshwa wan nimonesh-tililme wan myak masewalme, se itoka BarTimayos amo tachiyaya yewal Timayos nikon, ompa yowatikatka pa itenko in ot tahtantikatka tomi. <sup>47</sup>Kwah ompa otakak kampa panowaya Yehshwa in nasareteko, okipewalti tsatsiliste:

—Yehshwa, tewal nikon Dawid, shinishihnil newal!

<sup>48</sup>Myak ka yehwante ki'ahwaloya, kililoya pa amo nawati-tiyaskya. Ma yok, yewal wehwe tsatsiyaya:

—Tewal nikon Dawid, shinishihnil newal!

<sup>49</sup>Kwakin omokets Yehshwa, wan kinmili:

—Shihnotsak ma wal.

Wan kinotsak in yewal amo tachiyaya wan kilik:

—Shimochikawalti, shimokets, Yehshwa mishnotstik.

<sup>50</sup>Yewal kwakin okitas nishashal, haniman walmokets, oy kaha Yehshwa. <sup>51</sup>Yehshwa kitahtanili:

—Ashka ten tihnek pa nikchiwas pa tewal?

Kili in amo tachiyaya:

—Tamashtini, shikchi pa nitachiyas.

<sup>52</sup>Wan Yehshwa kili:

—Ya shiyapti; kampa otiktal motaneltokaliste otipahti.

Wan haniman otachi wan kitokatiyaya Yehshwa pa ot.

### Yehshwa okalak Yerushalém

(Mt. 21:1-11; Lk. 19:28-40; Yh. 12:12-19)

**11** <sup>1</sup>Kwah astiyaloya pa Yerushalém, ika inik BetPagé wan BetAnyá, pa i'ishpa in tepetLom itok Oliwo', Yehshwa okintetan ome nimoneshtililme, <sup>2</sup>kinmili:

—Shiyak pa in ranchit yewal nepa ta'ishpa nestik ka anmehwante, wan haniman ankalaktiyal, ankitaske se burroyankwik ilpitik, yewal ayamo'ak motali. Shiktomak shihwalikak. <sup>3</sup>Ta ak anmishtahtanili pates ankitomtikat, kwakin shikilik in TATS kiteshmonék, wan haniman kiwalkwepas.

<sup>4</sup>Oyak, wan kitak kampa ilpitikatka in burroyankwik katka pa kiyawak inawak ka nitatapoli, wan kitomak.

<sup>5</sup>Wan sek yehwante katkaloya ompa moketstikatkaloya kintahtanilik:

—Ten ankichihtikat? Pates ankitomtikat in burroyankwik?

<sup>6</sup>Yehwante kinankilik kina Yehshwa kinmili; wan kinmakawak pa yaloskya. <sup>7</sup>Kiwikilik in burroyankwik Yehshwa, kitalilik nitakemtel wan Yehshwa motal ipa yewal. <sup>8</sup>Niyok myak kinsowaloya inintakemtel pa ot, oksek kintehtektiyaloya nimahmashaltikito kwawim wan kintastiyaloya pa ot.

<sup>9</sup>Yehwante yaloya ta'ishpa, wan yehwante yaloya takwitap tsatsiyaloya, kitotiyaloya:

—Osana!<sup>l</sup> Ma kimashti akyewal wal ka ni'itokaliste in TATS! <sup>10</sup>Ma kimashti nireynaroliste totats Dawid, yewal walas! Tawiliste takpakIlwikak!

<sup>11</sup>Okalak Yehshwa pa Yerushalém, wan oy pa in tyopWe; wan tahtachiyaya mochiten ompa katka, kina tapohpoyaptiyaya panoti inak nimoneshtililme pa BetAnyá.

### Yehshwa ki'ahwa se kwawitIgero amo taki

(Mt. 21:18-19)

<sup>12</sup>Mostatik, kwah kisak pa BetAnyá, yewal walmayan.

<sup>13</sup>Okit pa wEhka se kwawitIgero yewal kipiyya ni'iswam; oy okit ta kipiyya nitaki kwah o'as amoten okit kipiyya ni'iswam, ayamo'ok katka nitonat pa kipiyyaskya nitaki. <sup>14</sup>Kwakin Yehshwa tahto ka kwawitIgero, wan kili:

<sup>l</sup> 11:9 “Osana” in se tahtol ka arameyo in kinek kito: “takishtiliste pa in poliwiliste” kina se “tamakawal.”



—Ma amo'ik amo'ak kikwa motaki.  
Kikakik nimoneshstililme in yewal ten kito.

**Yehshwa kinkishti yehwante tanamakaloya pa in tyopWe**  
(Mt. 21:12-17; Lk. 19:45-48; Yh. 2:13-22)

<sup>15</sup>Kwakin asik pa Yerushalém. Wan ompa okalak Yehshwa pa in tyopWe, okinkishti pa kiyawak yehwante tanamakaloya wan takowaloya pa in tyopWe. Kinishkwepil inimesa' kaha yehwante tataliloya tomi<sup>m</sup> wan niyok kaha mosewilme yehwante tanamakaloya wilom; <sup>16</sup>wan amo kinmakawaltiyaya pa panoloskya pa in tyopWe ka tamamaliste. <sup>17</sup>Wan kinmashtiyaya, kinmiliyaya:

—In takwihkwiloli kito: “Nokal kitokayoltiske se kal kaha Dyos kitahtaniske pa moshte masewalme”; ma yok anmehwante ankipiyal in tyopWe kina se teshkalkoyonke kampa motatil ta'ishtikiyanilme.



© 1996 David C. Cook

*Yehshwa kinkishti yehwante tanamakaloya  
pa in tyopWe (Markus 11:16)*

<sup>m</sup> 11:15 “Kipataloya tomi” in kinek kito: yehwante mokowililoya temakaliste.

<sup>18</sup>Kwah kikakik inik Tamashtinilme NitanawatilMoshé wan inik TotatsimWehwe, kitemoloya kina kimiktiloskya, ma yok kimakasiloya, kampa moshte masewalme katkaloya tapololme ka nitamashtiliste. <sup>19</sup>Kwah katka tyotak, Yehshwa okis pa in Wepweblo.

### **In kwawitIgero owak**

(Mt. 21:20-22)

<sup>20</sup>Panotiyaloya watsinko, okitak in kwawitIgero katka wak mochi ninelwa. <sup>21</sup>Kwakin ki'ilnamik Petros, wan kili:

—Tamashtini, shikit, in kwawitIgero tikili pa amokwal kiyaptiyas, ashka owak.

<sup>22</sup>Yehshwa kinankili:

—Shiyoltiyak kina kinek Dyos.<sup>n</sup> <sup>23</sup>Annimichilis melak, ta anmehwante ankilil in tepetLom nika: “Shimokets wan shimotamot pa in we'at”, wan ta taneltok ka niyol, yok motachiwas kina tahtan. <sup>24</sup>Kampa yok annimichilis in, mochi inik kitahtaniske Dyos, shitaneltokak kampa ankiptiyaske wan yok anmishmakaske. <sup>25</sup>Kwah ankitahtantiyaske Dyos, ta ak ankikwalanilil kwakin shikpohpowilik nita'ihetakoliste, kampa niyok anmoTatsDyos yewal onka pa in takpakIlwikak, yok anmishpohpowas anmota'ihetakoliste. <sup>26</sup>Anta amo ankinpohpowak, niyok anmoTatsDyos yewal onka pa in takpakIlwikak amo anmishpohpowas anmota'ihetakoliste.

### **Nitatakewaliste Yehshwa**

(Mt. 21:23-27; Lk. 20:1-8)

<sup>27</sup>Wan oksep asik Yerushalém. Wan yewal nehnemiya kalitik pa in tyopWe, asik ka yewal in TotatsimWehwe, in Tamashtinilme NitanawatilMoshé wan in Abwelolme Wehwetsim, <sup>28</sup>kitahtanilik:

—Pa ten nitatakewaliste tikchiptik inik tachiwaliste? Ak mishmak tatakewaliste ika tikchiptik in?

<sup>29</sup>Yehshwa kinnankili:

—Niyok annimishtahtanili se tahtol; wan shinishnankilik, kwakin annimichilis pa ten tatakewaliste nikchiptik.

<sup>30</sup>Nitakwatekiliste Yuhanes, katka yewal Dyos okitake pa in takpakIlwikak?, katka yewal masewalme? Shinishnankilik.

---

<sup>n</sup> 11:22 “Shiyoltiyak ipa Dyos” in kinek kito: shiktalik motaneltokaliste pa Dyos, yok ankimatiske kampa yewal kichi mochiten.

<sup>31</sup> Kwakin yehwante mo'ililoya se ka okse, kitoloya:  
 —Ta tikilik pa in takpakllwikak tichili: “Pates amo ankineltokak?” <sup>32</sup> Wan ta tikitok kampa masewalme?  
 Ma yok kinmakasiloya masewalme, kampa moshte yehwante kimatiloya kampa Yuhanes katka se niTaketsal nitahtolDyos. <sup>33</sup> Yok kinankilik Yehshwa:  
 —Amo tihmatil.  
 Kwakin Yehshwa kinmili:  
 —Newal niyok amo annimichilis pa ten tatakewaliste nikchiptik inik tachiwaliste.

**Tapowaliste ka tikipanolme amo kwahkwalme ka kwahmilUba**  
 (Mt. 21:33-46; Lk. 20:9-19)

**12** <sup>1</sup> Okipewalti Yehshwa taketsaliste ka se tapowaliste, wan kinmili:

—Se takat okitok se kwahmilUba, otatsakwa itenko; otahtak kaha kitesiloskya uba, wan okikets se kalWeyakPitsak.

<sup>2</sup> Wan okintane pa kimakaloskya nitaki tahko sek tikipanolme, kwakin panoti wEhka. <sup>2</sup> O'as in tonat yewal yoksi, okitake se nitikipanol pa yaskya konanaskya yewal nitakilme kwahmilUba. <sup>3</sup> Ma yehwante kikitskik kitehtewik, wan kiwalkwepak amoten kimakak. <sup>4</sup> Okse nitikipanol okititan; kimohmotak, kikoyonilik itsontek wan niyok kilitinemil kina yehwante kinekik. <sup>5</sup> Okititan okse, wan yewal kimiktik. Takwitap okintitan myak oksek; sek kintehtewik wan oksek kinmiktik.

<sup>6</sup> Mokawiliyaya in se han nikon, yewal kitasotaya miyak; niyok kititani ka yehwante, mo'iliyaya: “Kipiyaske tamawishtiliste ka nokon.” <sup>7</sup> Ma yok yehwante tikipanolme mo'ilik sek ka oksek: “Ina yewal yes niyashka; shiwalak ma tihmiktik wan in niyashka timokawiliske.” <sup>8</sup> Wan kiwalkitskik, kimiktik wan kitasak nimihki pa kiyawak in kwahmilUba.

<sup>9</sup> Kwakin Yehshwa otahtan:

—Ten kichiwas in tats ka kwahmilUba? Walas wan kinmiktis in tikipanolme wan kinmakas in kwahmilUba oksek.

<sup>10</sup> Ayamo momashtil in takwihkwiloli ipa ni'amaDyos? Yewal kito: In tet kitalaloya yehwante kichiptikatkaloya in kal, ma yok in tet omochi nitsontek mochi in kal.<sup>o</sup>

<sup>o</sup> 12:10 “In tet kitalaloya yehwante kichiptikatkaloya in kal, ma yok in tet omochi nitsontek mochi in kal” in takwihkwiloliste onka pa Salmo 118:22-23.

<sup>11</sup> In TATS okichi in, wan in tachiwaliste timotapololtiloya yewal tikitaloya in okichi.

<sup>12</sup> Wan yok kinekiloya kikitskiloskya kampa kimatiloya kikakiloya, kampa kitowaya ika yehwante in tapowaliste. Ma yok kinmakasiloya in masewalme, wan kikawak opanotiyak.

### **NitapishkalisteTomi ka tashtawaliste**

(Mt. 22:15-22; Lk. 20:20-26)

<sup>13</sup> Kwakin kititanilik sek parisheyo' wan ka in herodeyo', ta kitoskya ten amokwal, pa yok kikitskiloskya. <sup>14</sup> Yehwante asik kilik:

—Tamashtini, tehwanite titamatil kampa tewal melak titanawati, wan amo timokwitawi pa amo'ak wan amo tikiimitiyas kina nestiyaske takam, yok kampa melak titamashti kina Dyos. Ma yok kwal pa tiktashtawiliske in Kaysar nitapishkalisteTomi, amo ayak? Titemakaske, amo titemakaske?

<sup>15</sup> Ma yok yewal kimat kampa kipiialoya ome nishayak ka takwahkwamanaliste, wan kinmili:

—Pates kinekil nishkwahkwamanaske? Shihwalikak se tomiDenario, pa nikita.

<sup>16</sup> Yehwante kiwalikilik, wan kintahtanili:

—Ak nitakopinal in, wan ak nitakwihkwiloliste?

Yehwante kinankilik:

—In Kaysar nishayak.

<sup>17</sup> Kinnankili Yehshwa:

—Shihmakak Kaysar ten niyashka Kaysar, wan shihmakak Dyos niyashka Dyos.

Wan motapololtiloya ka yewal.

### **Nitahtaniliste kina oksep yolis**

(Mt. 22:23-33; Lk. 20:27-40)

<sup>18</sup> Kwakin walak sek yewal kineltokaloya nitamatiliste in saduseyo'. Kampa kitol amo yolil oksep; wan kitahtanilik:

<sup>19</sup>—Tamashtini, Moshé nitakwihkwiloliste pa in tahtol kito ta se takat mik wan kika nisiwa isel, wan amo kipiayak ininpilwam, kwakin ninohni in takat yewal omik, kipi pa monamikti ka nisiwa isel in kichiwas pa yok kipiayaske ininpilwam yewal itokaske kina in se yewal poli. <sup>20</sup> Katkaloya chikome ninohniwan. In ta'ishpa omonamikti, wan omik amo kika nikon. <sup>21</sup> Wan in takwitapik monamikti ka in siwat,

yewal omik niyok amo kika nikon; yok opan niyok ka in yey ninohniwan. <sup>22</sup>Wan yok okinpan in chikome amo kinkawak ininpilwam ka in siwat. Kwah moshte mikik wan niyok omik in siwat. <sup>23</sup>Kina oksep yolis, kimani walyoliske oksep, kati yes nitaka in siwat, kampa in chikome monamiktik inak yewal?

<sup>24</sup>Kwakin Yehshwa kinnankili:

—Anmehwante anmopololtitikat, amo ankimatil nitakwihkwiloliste wan nichikawaliste Dyos. <sup>25</sup>Kampa pa in tonat yewal yoliske oksep inik mihmihki, amo monamiktiske wan amo kitemakaske pa monamiktis, antamo yoliske kina nitanawatilanelmeDyos yehwante kat pa in takpakIlwikak. <sup>26</sup>Wan nahyehwante mihmihki yoliske oksep, amo anmomashtik pa amatTakwihkwilol Moshé, kina okinots Dyos pa in wiste tatatitikatka? Yok kito: “Newal ninewal niDyos AbRaham, wan niDyos Itsak wan niDyos Yakob.” <sup>27</sup>Dyos amo ininDyos mihmihki, antamo ininDyos yehwante yohyolke; yok anmehwante anmopololtitikat.

### NiweTanawatilisteDyos

(Mt. 22:34-40)

<sup>28</sup>O'as se Tamashtini NitanawatilMoshé, yewal kinkak kwah taketstikatkaloya, kimat kampa Yehshwa kinnankili kwal wan kitahtanili:

—Kati yewal niWeTanawatilisteDyos pa mochi?

<sup>29</sup>Kinnankili Yehshwa:

—In tanawatiliste monots we ka inik: “Shihkak, Isra'El, in TATS, toDyos, in se han noTATS. <sup>30</sup>Wan shiktasot in TATS moDyos ka mochi moyoliliste, ka mochi mo'ihyo, wan ka mochi mota'ilnamikiliste wan ka mochi mochikawaliste.” <sup>31</sup>Wan in takwitapit, in monots we kito: “Shiktasot monihni kina tewal timotasot.” Amo onka okse monotsaliste we ka nitanawatilisteDyos yok kina inik.

<sup>32</sup>Kwakin in Tamashtini NitanawatilMoshé kili:

—Kwal tikito, tamashtini. Melawak tikito, kampa se han onka Dyos, wan amo onka okse Dyos. <sup>33</sup>Wan ta se kitasot Dyos ka mochi niyoliliste, wan ka mochi nita'ilnamikiliste, wan ka mochi tamatiliste, wan ka mochi nichikawaliste, wan shiktasot monihni kina mosel timotasot, amoyok monotsal in tamakaliste wan mochiten in tamiktiliste tachichinoliste.

<sup>34</sup>Kwakin, Yehshwa okit kina kwal kinankili ka tamatiliste, wan kito:

—Amo wEhka timo'it ka nireynarolisteDyos.  
Kwakin moshte kimakasiloya pa kitahtanililoskya oksep.

**Akyewal nikon in Kristo?**  
(Mt. 22:41-46; Lk. 20:41-44)

<sup>35</sup>Yehshwa tamashtiyaya pa in tyopWe, kinmiliyaya:  
—Pates kitol in Tamashtinilme NitanawatilMoshé kampa  
yewal Kristo onka nikon Dawid? <sup>36</sup>Yewal isel Dawid kito, ka in  
EspirituSanto, kito:

In TATS kili noTATS:

“Shimotal pa nomahwakwal,  
pa kimani nikintalis itsinta motankwa yehwante  
mishkokolil.”<sup>p</sup>

<sup>37</sup>Isel yewal Dawid kitokayolti niTATS, kina kwakin yewal  
kwal nikon?

Wan myak masewalme, takaktikatkaloya ka pakiliste.

**Yehshwa kinteshpawiliyaya inik Tamashtinilme  
NitanawatilMoshé**

(Mt. 23:1-36; Lk. 11:37-54; 20:45-47)

<sup>38</sup>Wan kinmiliyaya nitamashtiliste Yehshwa:

—Shimokwitawik ka Tamashtinilme NitanawatilMoshé,<sup>q</sup>  
kampa kinektiyaske nehnemtiyaske ka inintakemtel wehweyak,  
pa moshte kintahpaloske ka miyak tamawishtiliste pa inik  
plasa'. <sup>39</sup>Kinektiyaske motaliske kaha motalilme monotsalme  
we pa in siya' pa in tyopalmeYudiyo' niyok kinektiyaske  
motaliske kaha motalilme monotsalme we pa takwaliste,  
<sup>40</sup>kinkishtili mochten tapiyal in siwam inintakam mihmihki,  
mokwamanal ka tahtanilisteDyos ka miyak tahtolme. Yeh-  
wante kinmakas miyak takokoliste Dyos.

**NitemakalisteDyos ika se siwat isel ka se tomi tipichi**  
(Lk. 21:1-4)

<sup>41</sup>Yehshwa yowatikatka pa i'ishpa komit ka temakalisteDyos  
in tyopWe, wan kinmitatikatka kina kitastikatkaloya tomi pa

<sup>p</sup> 12:36 “Shimotal pa nomahwakwal, pa kimani nikintalis itsinta motankwa  
yehwante mishkokolil” in takwihkwiloliste onka pa Salmo 110:1.

<sup>q</sup> 12:38 “Shimokwitawik ka Tamashtinilme NitanawatilMoshé” in kinek  
kito: amo shikinneltokak ten kitol kampa amoyok kichiwal kina  
tamashtil.

itik komit, nahyehwante kipiyaloya miyak tomi kitasaloya miyak tomi. <sup>42</sup>Wan o'as se siwat yewal nitaka mihki, amoten kipiyya wan okitas ome tomitonte.<sup>r</sup> <sup>43</sup>Yehshwa okinnots nimo-neshtililme, wan kinmili:

—Melak annimichilis, in siwat nitaka mihki amoten kipiyya otemak miyak amoyok kina inik oksek ma amoyok miyak temakak in oksek kitemakaloya Dyos; <sup>44</sup>yehwante temakaloya tipit han kishki amo kiteshmonekiloya; wan in siwat nitaka mihki, amoten kipiyya, otemak mochi yewal kishki ka yoliskya.

### Yehshwa kinmili kina kishitiniske tyopWe

(Mt. 24:1-2; Lk. 21:5-6)

**13** <sup>1</sup>Yehshwa kisaya kiyawak in tyopWe, kwah se nimo-neshtililme kili:

—Tamashtini, shikit inik tetelme yewal takalchiwalme!

<sup>2</sup>Yehshwa kinankili:

—Tikit inik wehwe takalchiwalme? Amo mokawas tet ipa okse tet pa in kalme. Mochi motashitinis yok amoten mokawas.

### Ten taneshtiliste yeske ka in tamiliste

(Mt. 24:3-28; Lk. 21:7-24; 17:22-24)

<sup>3</sup>Katka Yehshwa yowatikatka pa tepetLom kaha ta'itok Oliwo', yewal katka i'ishpa in tyopWe. Wan Petros, Yakobo, Yuhanes wan André'as kitahtanilik ka iselte:

<sup>4</sup>—Shitichil kimani panos in. Wan kati yes taneshtiliste pa mochi inik tachiwaliste ten kat pa monamikiske?

<sup>5</sup>Yehshwa tanankili:

—Shitachishtiyak, pa yok amo'ak anmishkwamana. <sup>6</sup>Kampa miyak walaske ka no'itokaliste kitotiwalaske: “Newal ninewal niKristo”; yok kinkwahkwamanaske miyak.

<sup>7</sup>Kwah antakakiske kampa momiktitikat wan mota'itotiyas kampa momiktitikat, amo shimomaptitiyak, kampa yok monek pa motachiwas ta'ishpa; wan ayamo tamis in mochital. <sup>8</sup>Kampa masewalme mo'onanaske pa se pweblo' ika okse pweblo'; yehwante reynarotikat mo'onanaske ka okse reynaroliste, yeske tamolinilme hyero wehwe in tal, kampa niyok yes mayanaliste. In nipewaliste yes takokoliste inik yeske.

<sup>r</sup> 12:42 “Tomitonte” in kinek kito se tomi moshelo tahko wan in nitahko temaka okse nitahko.

<sup>9</sup>'Anmehwante shimokwitaptiyak; kampa anmishtemakaske ka nichikawaliste nitanichikolme in Abwelolme Wehwetsim, wan anmishwitikiske pa in tyopalmeYudiyo'. Kampa annishneltokal newal anmishwikaske pa nita'ishpa tatakewalme wan weReye' pa yok temakaske tachiwaliste; ka newal pa yehwante. <sup>10</sup>Wan monek ta'ishpa, nitamashtilisteKwal, kipi pa yes nitana-watiliste pa mochi inik masewalme. <sup>11</sup>Kwah anmishkitskiske wan anmishtemakaske amo shimomaptik, kampa ten ankitoske. Han shikitok yewal ten anmishilnamikiltis pa ankitoske; kampa amo anmehwante antahtoske, hanwel EspirituSanto.

<sup>12</sup>In ninohni kitemakaske pa kimiktiske ninohni wan inintahwan kintemakaske ininpilwam, wan ininpilwam kinkwalaniliske inintahwan kintemakaske pa kinmiktiske. <sup>13</sup>Wan moshte anmishkokoliske kampa annishneltokal ka no'itokaliste; ma yok akyewal amo momakawilti pa newal, yewal mokishtilis niyoliliste.

<sup>14</sup>'Danyel niTaketsal nitahtolDyos kikwihkwilo pa ni'ama kwah ankitaske se tachiwaliste ten amokwal ka ta'ihyaliste; ta onka ompa kampa amoyok pa ta yeskya —ma kimat ten kinek kito in yewal momashtitik—, kwakin ma cholok pa tepetLom yehwante yeske pa in Yudaya. <sup>15</sup>Ak yes ikpak kal amo temos, amo kalakis pa kikishtis pek ten pa ni'icha; <sup>16</sup>wan akyewal yes pa in tashosholtik, amo mokwepas pa konanas nishashal. <sup>17</sup>Kina kinyas yehwante ostitikat wan yehwante kinpiyal ininpilwam wan aki tachichiltitiyaske pa inik tonatim! <sup>18</sup>Wan shiktahtanik Dyos, kampa inik amo panos kwah sewalko; <sup>19</sup>kampa pa inik tonatim yeske ka miyak takokoliste yes kina yewal amo'ik kinpanowaya, kima-ni okipewalti Dyos mochten okichi, wan amo yes okse amo'ik. <sup>20</sup>Ta in TATS kiwehkawaltiskya pa inik tonatim, amo'ak mokishtiliskya niyoliliste; ma yok amo okiwehkawalti, ka in ta'onanilme.

<sup>21</sup>'Kwakin ta ak anmichil: “Shikitak, nika onka in Kristo”, “Wan Shikitak, nepa onka”, amo shihneltokak. <sup>22</sup>Kampa walaske amo yeske melawak Kristo' wan niyok walaske ka nitikwamanaliste in niTaketsalme nitahtolmeDyos; kinchi-waske pa moneshtiske wan kinchiwaske taneshtiliste ka chikawaliste pa yok kinkwamanaske, niyok yehwante ta'onanilme. <sup>23</sup>Anmehwante shitachishtiyak ashka annimichilis kampa mochten yewal panos.



### Kimani walas NitakaTakpakIlwikak

(Mt. 24:29-35, 42-44; Lk. 21:25-36)

<sup>24</sup>'Pa inik tonatim, kwah tamiske panoske takokoliste in tonat waltayowaya, wan meste amo mestone, <sup>25</sup>in sitalme walwetsiske pa in ilwikak, wan in tatakewalme pa ilwikak motsehtseloske.

<sup>26</sup>Kwakin moshte kitaske NitakaTakpakIlwikak, walatiwalas pa in ayawim ka we nichikawaliste wan nitawiliste. <sup>27</sup>Wan yewal kintakewas nitanawatilanelhme, pa kinnichikoske Dyos nita'onanalme kaha waltakis tonat, kaha tamalin tonat kaha takpak kaha pa tatsinta ka itenko mochital ka itenko ilwikak.

<sup>28</sup>'Shihmatik ka kwawitIgero inak in tapowaliste: Kwah nimashaltik seseltik, wan kikisal ni'iswam, kwakin ankimatil kampa amo wehkawas shopanta. <sup>29</sup>Yok niyok anmehwante kwah ankitaske in panotik mochi yewal annimichilitik, kwakin ankimatiske kampa astiwalal in tonatim, kampa onka pa in tatapoli.

<sup>30</sup>Melak annimichilis in, panos mochi in kwah ayamo mikiske masewalme ashka yoltikat pa in tonatim. <sup>31</sup>In takpakIlwikak wan in mochital panoske, ma yok notahtolme amo panoske.

<sup>32</sup>'Amo'ak kimat in tonat wan in ora, kimani panos in, niyok amo kimatil nitanawatilanelhme pa in takpakIlwikak, niKon niyok amo kimat. Han in TatsDyos yewal kimat.

<sup>33</sup>'Anmehwante shitachishtiyak shi'isatiyak, wan shiktahtoltik Dyos, kampa amo ankimatil ten tonat asis.

<sup>34</sup>Kina se masewal yawiya wEhka, okika nikal wan kinmak tatakewaliste inintikipanolme, sesen kinpiyal inintikipanoliste wan kitake ka tatapoli pa takwitaptiyas. <sup>35</sup>Yok shi'isatiyak anmehwante, kampa amo ankimatil kimani walas in tats nikal, amo ankimatil ta walas pa tyotak, ipanta yowal, kimani tsa-tsi in gayo, kwah tahtanesti; <sup>36</sup>ta yewal walas kimani amo ankichishtiyaske yok anmishasis ankoshtiyaske. <sup>37</sup>Ina yewal ten annimichilitik anmehwante, moshte nikinmili: Shi'isatiyak.

### Kitemol kina kwal kikitskiske Yehshwa

(Mt. 26:1-5; Lk. 22:1-2; Yh. 11:45-53)

**14** <sup>1</sup>Pa ome tonatim pa asiskya ipaskwa yudiyo' wan katka mitotiliste nitonatilme kwah kikwal pan yewal amo kipi taposhawalti. Wan kitemoloya ka tekwamanaliste inik TotatsimWehwe wan Tamashtinilme NitanawatilMoshé pa kikitskiloskya Yehshwa pa kimiktiloskya. <sup>2</sup>Yok kitoloya:

—Amo tihkitskiske pa in mitotiliste, kampa mokwalantiske masewalme.

**Yeshwa kishawililoya yewal kwal ahwiyak pa BetAny**

(Mt. 26:6-13; Yh. 12:1-8)

<sup>3</sup>Kwah katka Yeshwa pa BetAny, yowatikatka kaha takwal pa nikal Shimón yewal okipi kokoliste itok lepra; o'as se siwat kiwalikaya se tapalkatonte tachiwal ka se tet itok alabastro ka aseyte kwal ahwiyak itok nardo chipak, kostarowaya miyak. Kwakin okitapan in tapalkatonte wan kishawili in ahwiyak pa nitsontek Yeshwa. <sup>4</sup>Sek yehwante ompa katkaloya mokwalantik iseltek, mo'ilik:

—Pates mo'ihitako yok in aseyte kwal ahwiyalme?

<sup>5</sup>Kwal tihnamakaloskya ka 300 tomiPlata<sup>s</sup> wan in tomi tikinmakaloskya yehwante amoten kipiwal.

Wan kitaketsaloya siwat.

<sup>6</sup>Yeshwa kinmili:

—Shihkawak; pates hyero kilitikat? Yewal onishchiwil se tachiwaliste kwal. <sup>7</sup>Hanse kat ka anmehwante yewal amoten kipiwal, kimani ankinetiwaloskya pa kichiwaloskya kwal ka yehwante; wan newal amo hanse nishpiyaske. <sup>8</sup>Ina siwat okichi kina ten kwal katka; okichi kina kimani pa asis in tonat wan okishawil nokwerpo pa kimani nishtapacholoskya. <sup>9</sup>Melak annimichilis, kaha han yes nitanawatilisteDyos in nitamashtilisteKwal, pa mochi kishki tal, niyok taketsaske ten okichi in siwat, yes ta'ilnamikiliste.

**Yudas tatenewili pa kitemaka Yeshwa**

(Mt. 26:14-16; Lk. 22:3-6)

<sup>10</sup>Kwakin Yudas IshKaryót, yewal oye se ka in 12 oy okinmit TotatsimWehwe pa kitemakaskya. <sup>11</sup>Kwah yehwante okikakik, pakiloya, wan kitenewilik pa kimakaloskya tomi. Wan Yudas kitemowaya kina kitemakaskya.

**Takwaliste ka ta'ilnamikiliste pa in TATS**

(Mt. 26:17-29; Lk. 22:7-23; Yh. 13:21-30; 1 Ko. 11:23-26)

<sup>12</sup>Katka in se ta'ishpa tonat ka mitotiliste kwah kikwaloya pan yewal amo kipi taposhawalti, kwah kimiktiloya kina ofrenda in borrego pa in paskwa, nimoneshtililme kitahtanilik Yeshwa kilik:

---

<sup>s</sup> 14:5 “Tomiplata” in kinek kito: tomi denario'

—Kaha tihnek titayokshitiske pa tikwaske nitakwaliste in paskwa?

<sup>13</sup> Yehshwa okintetan ome nimoneshtililme, kinmili:

—Shiyak pa in Wepweblo, ompa ankitaske se takat kimamti se komit ka at. Shiktokak, <sup>14</sup> kampa kalaki, shikilik in nikal in tats: “Kito in tamashtini: Kaha onka in kalitik kampa nitakwas in paskwa ka nomoneshtililme?” <sup>15</sup> In nikal in tats anmishnishtili se kalitik we pa takpak, ompa yes mochten moteshmonek; shitayokshitik ompa pa tehwane.

<sup>16</sup> Oyak nimoneshtililme wan kalakik pa in Wepweblo, wan kitak kina Yehshwa kinmili; wan tayokshitik nitakwaliste paskwa.

<sup>17</sup> Kwah tapohpoyapti, owal Yehshwa ka in 12 nimoneshtililme. <sup>18</sup> Kwah katkaloya kaha takwal, kimani takwatikatkaloya kito Yehshwa:

—Melak annimichilis se ka anmehwante, nishtemakas ashka takwatik ka newal.

<sup>19</sup> Kwakin yehwante moyokoltiloya wan se ka okse, kitahtanilik:

—Newal niyes?

<sup>20</sup> Wan Yehshwa kinnankili:

—Se yewal ka anmehwante onka 12, yewal kipaltili nipan ka newal pa in tapalkat. <sup>21</sup> Kampa melak, NitakaTakpakIlwikak kipanós kina onka takwihkwiloliste ka yewal; ma yok panos takokoliste in takat yewal kitemakas pa kimiktiske! Kwal katka ta in takat pa amo takatiskya.

<sup>22</sup> Kimani takwaloya, Yehshwa okonan pan, wan kimashti Dyos, wan kintalil tahtahko, kinmili:

—Shikwak in, yewal nokwerpo.

<sup>23</sup> Okonan tapalkatonte kimak tashtawiliste Dyos, kwakin okinmak yehwante wan moshte takonik. <sup>24</sup> Kwakin kinmili:

—Ina noyEste ka yewal se taketsalisteYankwik<sup>t</sup>, in nikchibas pa myak masewalme mototokaltis. <sup>25</sup> Melak annimichilis, kampa amo nikonis oksep nihugoUbaBino, pa kimani asis in tonat nikonis yewal nihugoUbaBino yankwik kaha Dyos reynaro.

---

<sup>t</sup> 14:24 TaketsalisteYankwik in kinek kito: ka niyEste Yehshwa mototokalti ka ta'ihniliste ka tota'ihntakoliste pa myak masewalme, yahmo yok kichwaske kina in temakaliste kichiwaloya ka yolilikme ika tota'ihntakoliste ka ta'ihniliste pa Dyos.

**Petros kito kampa amo ki'ishmat Yehshwa**

(Mt. 26:30-35; Lk. 22:31-34; Yh.13:36-38)

<sup>26</sup>Kwah tamik nitatsotsonaliste Dyos, kwakin panotiyak pa in lom itok Oliwo'. <sup>27</sup>Kwakin Yehshwa kinmili:

—Moshte anmehwante kipoloske anmotaneltokaliste ka newal ashka pa in yowal; kina onka nitakwihkwilolisteDyos: “Nihmikti yewal kinkwitawi in borrego', wan in borrego' mose-semanaske.” <sup>28</sup>Ma yok, newal niyolis oksep, kwakin niyas ta'ishpa ka anmehwante pa Galileya.

<sup>29</sup>Kwakin Petros kili:

—Yok moshte kipoloske motaneltokaliste, newal amo nikpolos.

<sup>30</sup>Yehshwa kili:

—Melak nimichili ashka pa in yowal, ayamo'ok tsatsi ohpa in gayo, tewal pa yeshpa tikitos kampa amo tinishishmat.

<sup>31</sup>Ma yok Petros mochikawalti:

—Ta yok monek pa nimikis monak tewal, amo'ik nikitos kampa amo annimishishmat.

Wan moshte yok kitoloya.

**Yehshwa kitahtolti Dyos pa GetSemani**

(Mt. 26:36-46; Lk. 22:39-46)

<sup>32</sup>Kwakin asik kaha ta'itoka GetSemani, wan kinmili Yehshwa nimoneshstililme:

—Shimotalik nika, ma yok newal niyas niktahtoltis Dyos.

<sup>33</sup>Okinwik Petros, Yakobo wan Yuhanes, wan okipewalti yolkokoliste wan momaptitikatka. <sup>34</sup>Wan kinmili:

—Hyero nitamat pa noyol yok hyero we nimoyolkokotik kina ta newal nihnekiskya nimikiskya. Nika shimokawak, wan shi'isatiyak.

<sup>35</sup>Wan oy Yehshwa amo wEhka, motankwakets pa tal, Dyos kitahtaniyaya ta kwal katka, pa yewal amo kipi'yaskya pa kipa-noskya in takokoliste. <sup>36</sup>Kitowaya:

—Abba, noTatsDyos, mochiten kwal tikchiwas tewal; shihkishti pa newal in takoniliste chichik, ma yok amo shikchi in yewal newal nihnek, ma yok shikchi in yewal tewal tihnek.

<sup>37</sup>Kwakin omokwep kaha katkaloya nimoneshstililme, okin-mit koshtikatkaloya; kwakin kili Petros:



© 1996 David C. Cook

*Yeshwa kitahtolti Dyos pa GetSemani (Markus 14:35)*

—Shimón, tikoshtik? Pates amo oti'isati se ora? <sup>38</sup>Shi'isatiyak shiktahtanik Dyos, pa amo mishkwamana tawalilot. Melak animichilis, anmota'ilnamikiliste kinek kichiwas kina Dyos, ma amoyok ininkwerpo amo chikawak.

<sup>39</sup>Oksep yawiya kitahtaniyaya Dyos, yok oksep kito-wayaya nitahtaniliste Dyos. <sup>40</sup>Kwah oksep omokwep, kaha kat-kaloya okinmit koshtikatkaloya, kampa kipiwaloya miyak kochmikiliste. Wan amo kimatiloya kina kinankililoskya.

<sup>41</sup>Mokwepaya pa yeshpa, kinmili:

—Ankoshtikat wan anmoseptikat. Yaaa, ashka o'as in ora shikitak NitakaTakpakIlwikak yes tatemakal ka masewalme ka ta'ihentakolme. <sup>42</sup>Shimoketsak, ma tiyak; shikitak ashka wal yewal nishtemakas.

**Kikitskil Yeshwa**

(Mt. 26:47-56; Lk. 22:47-53; Yh. 18:2-11)

<sup>43</sup>Ayamo'ok tamiyaya tahtowaya Yeshwa wan o'as Yudas, yewal se ka in 12, ka yewal walaloya myak masewalme kinwalikaloya kawayan ka momiktiliste wan kwawim. Kintakewak in TotatsimWehwe, wan in Tamashtinilme NitanawatilMoshé wan oksek Abwelolme Wehwetsim. <sup>44</sup>In kitemak yewal kinmak se taneshtiliste:

—Ak niktenamiki, yewal yes; shihkitskik wan shihwikak kwal shihilpik.

<sup>45</sup>Kwakin Yudas astiwalaya kaha Yeshwa kili:

—Tamashtini.

Wan kitenamiki. <sup>46</sup>Kwakin yehwante kikitskik Yehshwa, wan ki'lpik.

<sup>47</sup>Wan se ka inik katkaloya ka Yehshwa okikishti niteposte ka momiktiliste kikotonil se ninaka nitikipanol TotatsWe.

<sup>48</sup>Kinnankili Yehshwa kinmili:

—Kina ika se ta'ishtikiyan anwalal ka kawayan wan ka kwawim pa annishkitskiske? <sup>49</sup>Hanse tonatim nikatka ka anmehwante nitamashtiyaya pa in tyopWe, wan ompa amo annishkitskik. Ma yok panotik in yok pa tamis motachiwas kina kito nitakwihkwilolisteDyos.

<sup>50</sup>Kwakin moshte nimoneshstililme kikawak wan cholok.

### Se takatYankwik ochol

<sup>51</sup>Wan se takatYankwik yewal kitokatiyaya, liyarotiyaya ka se tilmaShashal, kikitskik; <sup>52</sup>yewal haniman ochol mokopin nitilmaShashal, wan nakatil panoti.

### Yehshwa ininishpa wehwetatakewalme

(Mt. 26:57-68; Lk. 22:54-55, 63-71; Yh. 18:12-14,19-24)

<sup>53</sup>Kiwikak Yehshwa ni'ishpa TotatsWe; wan monichikok moshte TotatsimWehwe, Abwelolme Wehwetsim wan Tamashtinilme NitanawatilMoshé. <sup>54</sup>Petros kitokatiyaya pa wEhkit o'as wan okalak ka nipatyo nikal TotatsWe, ompa moka yowati ka in tikipanolme mototontikatka ka teshoshte.

<sup>55</sup>In TotatsimWehwe wan moshte in kaha tahosgaroloya in tanichikolme tatakewalme yudiyo' kitemoloya ta ak kitenewaskya se tachiwaliste ika Yehshwa, pa yok kimiktioskya; wan amo kitak. <sup>56</sup>Myak kitekwamanaliloya ka sek tachiwaliste ika yewal, ma yok inintachiwaliste kina kitoloya amoyok katka kina oksek kitoloya. <sup>57</sup>Kwakin moketsak sek kitekwamanaliloya ka tachiwaliste ika yewal, kitoloya:

<sup>58</sup>—Tehwante tihkakik yewal kito: “Nikinshitinilis in tyopWe yewal kichiwak takam, wan panoske yey tonatim nikchiwas okse tyopWe yewal amo kichiwask takam ka ininmahwam.”

<sup>59</sup>Ma yok yehwante amo monamikiloya pa inintachiwaliste.

<sup>60</sup>Kwakin omokets TotatsWe kitahtanili Yehshwa, kili:

—Amo titanankili? In yewal ten mishtaketstikat?

<sup>61</sup>Yehshwa amo nawati, wan amoten kito. Kwakin oksep kitahtanili in TotatsWe, kili:

—Tewal tiKristo, Tewal nikonDyos tamashti?

<sup>62</sup>Yehshwa kinankili:

—Newal ninewal. Wan anmehwante ankitaske NitakaTakpakIlwikak yowatiyas pa nimahwakwalDyos yewal kipi nichikawaliste, wan walatiwalas pa ayawim ka ilwikak.

<sup>63</sup>Kwakin in TotatsWe kitsayani nishashal<sup>u</sup>, wan kito:

Pates tihnekil oksek tachiwaliste? <sup>64</sup>Anmehwante ankikakil yewal amokimawishtiliDyos; ten ankitol?

Wan moshte yehwante kiteshpawililo ya kitoloya ma mik.

<sup>65</sup>Kwakin sek kichihchaloya, kitapacholoya nishayak ka shashal kwakin kitihitiwiloya, kililoya:

—Shitichil ak mishte!

In gwacho' kiwachililo ya pa nishayak.

### **Petros kito amo ki'ishmat Yehshwa**

(Mt. 26:69-75; Lk. 22:56-62; Yh. 18:15-18, 25-29)

<sup>66</sup>Kwah Petros katka tatsinta pa patyo kiyawak, o'as se tikipanolSiwat in TotatsWe; <sup>67</sup>wan okit Petros mototontikatka ka teshoshte, kili:

—Tewal niyok tikatka ka Yehshwa in nasareteko.

<sup>68</sup>Petros kitat melawak, kitowaya:

—Amo nikishmat, wan amo nihmat ten tinichilitik.

Wan okis pa kiyawak nitatapol in kal. Kwah tsatsi gayo.

<sup>69</sup>Wan tikipanolSiwat okit oksep wan okipewalti kinmili yehwante katkaloya ompa:

—Ina se yewal ka yehwante.

<sup>70</sup>Wan Petros oksep kito kampa amo nikishmat. Wan amo wehkawak, yehwante oksep kililoya:

—Melak, tewal se ka yehwante; kampa tewal ti'onka, tigelileyo.

<sup>71</sup>Kwakin Petros kipewalti ka nitahtol wan ma amokwal nishyas:

—Amo nikishmat in takat yewal anmehwante taketstikat.

<sup>72</sup>Wan in gayo tsatsi ohpa. Kwakin kiwalilnamik Petros kina kili Yehshwa: “Kwah ayamo'ok tsatsi ohpa gayo, wan tewal tikitos pa yeshpa amo tinishishmat.” Kwah ki'ilnamikiyaya walchokaya.

---

<sup>u</sup> 14:63 Kitsayani nishashalme in kinek kitos, se tanestiliste ka tayolkokoliste.

### Yehshwa ni'ishpa Pilatos

(Mt. 27:1-2, 11-14; Lk. 23:1-5; Yh. 18:28-38)

**15** <sup>1</sup>Kwah tanes, wan hani monichikok inik TotatsimWehwe wan Abwelolme Wehwetsim, wan Tamashtinilme NitanaawatilMoshé wan moshte inik kaha tahosgaroloya in tanichikolme tatakewalme yudiyo'. Kiwikak Yehshwa ki'ilpik wan kimakak Pilatos. <sup>2</sup>Pilatos kitahtanili:

—Tewal ininWeReyYudiyo'?

—Yehshwa kinankili: Tewal tikito.

<sup>3</sup>In TotatsimWehwe wan kiteshpawililoya ka myak tachiwaliste. <sup>4</sup>Yok Pilatos kitahtanili oksep:

—Amoten titanankili? Shikit kina mishteshpawilitikat ka myak chikawaliste.

<sup>5</sup>Wan Yehshwa amo tanankil; motapolowaya miyak Pilatos.

### Kitoloya kampa Yehshwa kipi'yaskya pa mikiskya

(Mt. 27:15-31; Lk. 23:13-25; Yh. 18:38-19:16)

<sup>6</sup>Pa in mitotiliste Pilatos kimakawaltiyaya se tatsawal, kati masewalme kinektiyaloskya. <sup>7</sup>Katka se itoka BarAbas, katka tatsakwal ka inihniwan nahyehwante momiktik ka gwacho' romano' wan kinmiktik masewalme. <sup>8</sup>Kwah myak masewalme yak, kitahtanik Pilatos pa kichiwaskya yok kina kimatiya kichiyaya. <sup>9</sup>Pilatos kinnankili:

—Ankinakil pa annimishmakawiltis ininWeReyYudiyo'?

<sup>10</sup>Kimatiya Pilatos kampa TotatsimWehwe kitemakaloya kampa kikokoliloya. <sup>11</sup>Wan TotatsimWehwe kinchiwaltik myak masewalme pa kitahtaniloskya Pilatos pa kimakawaloskya BarAbas. <sup>12</sup>Pilatos kintahtanili:

—Wan ten ankinakil nikchiwilis yewal anmehwante kilil ininWeReyYudiyo'?

<sup>13</sup>Wan yehwante tanankilik ka tsatsiliste:

—Shikilpik pa se kruskwawit!

<sup>14</sup>Pilatos kinmili:

—Ten amokwal okichi?

Ma yok yehwante ka chikawaliste tsatsiloya:

—Shikilpik pa se kruskwawit!

<sup>15</sup>Kwakin Pilatos kinmakawil BarAbas; pa kinpakiltiskya masewalme wan otatake pa kiwihwitekiloskya Yehshwa, wan kitemak pa ki'ilpiloskya pa kruskwawit.



<sup>16</sup>In gwacho' kiwikak kalitik pa nipatyo nikaI Gobernador, wan kinnichikok mochi Igwacho'. <sup>17</sup>Wan kitakemiltik Yehshwa ka se shashal morado, wan kichiwilik se yawaltik wiste wan kitalilik pa nitsontek. <sup>18</sup>Kwakin kitahpaloloya:

—Ma yol ininWeReyYudiyo'!

<sup>19</sup>Kiwitikiloya pa itsontek ka se otat, kichihchaloya, kitankwaketsaliloya pa ni'ispa. <sup>20</sup>Yok tamik kiwetskilik, kwakin kikishtilik nitakemtel morado kitakemiltik ka nitakemtel. Wan ompa kikishtik pa kisaloloskya pa nikruskwawit.

### Yehshwa ki'ilpik pa kruskwawit

(Mt. 27:32-44; Lk. 23:26-43; Yh. 19:17-27)

<sup>21</sup>Wan okitakewak se yewal panowaya yewal mochan-tiyaya pa Kirene, itoka Shimón, yewal nitats Alesandros wan Rupus, kampa walaya pa in tashosholtik; kimamaltilik nikruskwawit Yehshwa. <sup>22</sup>Yok okiwikak Yehshwa kaha ta'itok Golgota, in kinek kito nitsontek mihki. <sup>23</sup>Kimakak pa koniskya nihugoUbaBino inak se chichik itok mirra, wan Yehshwa amo okon. <sup>24</sup>Kwah ki'ilpik pa kruskwawit; kichiwak ten itonal



© 1996 David C. Cook

*Shimón in kirene kimamaltilik nikruskwawit  
Yehshwa (Markus 15:21)*

kipiyaloskya ka nishashasalme Yehshwa, pa kimatiloskya ten motakawililoskya sesen in gwacho'.

<sup>25</sup>Kwah ki'ilpik pa kruskwawit katka chiknawi ora pa watsinko. <sup>26</sup>Wan takwihkwilok pates katka tateshpawiliste wan in takwihkwiloliste kitowaya: "IninWeReyYudiyo." <sup>27</sup>Wan ka yewal niyok ki'ilpik pa kruskwawit ome ta'ishtikiyanim, se katka pa nimahwakwal wan okse pa nimahwamapoch. <sup>28</sup>Yok omonamik nitakwihkwilolisteDyos yewal kito: "Wan yok tapowal yes ka inik amokwal kichiwal."v

<sup>29</sup>Yehwante panoloya hyero kililoya, ki'oliniloya inintsontek kililoya:

—Aaah! Tewal in takat yewal kito nikinshitinilis nityopWe kwah panos yey tonatim nikalchiwas oksep, <sup>30</sup>shimokishtil moyoliliste tewal mosel wan shitem pa in kruskwawit.

<sup>31</sup>Yok niyok kiwetskililoya, in TotatsimWehwe mo'ililoya sek ka oksek ka Tamashtinilme NitanaawatilMoshé:

—Okinkishti oksek, ma yok amo momokishtili isel. <sup>32</sup>Ta in Kristo, in weRey pa Isra'El, ma tem pa in nikruskwawit, yok tikitaské wan tihneltokaske.

Wan niyok hyero kililoya yehwante salotikatkaloya pa kruskwawit ka yewal.

### **Yehshwa omik**

(Mt. 27:45-56; Lk. 23:44-49; Yh. 19:28-30)

<sup>33</sup>Pa takwalispa, waltayoway pa mochital wan yok omoka pa yey ora'. <sup>34</sup>Wan pa yey ora' pa tyotak Yehshwa tsatsi ka chikawaliste kito:

—Elohi, Elohi! Lama sabaktani? —Kinek kito: NoDyos, noDyos, Pates otinishka?

<sup>35</sup>Kwah kikakik sek yehwante ompa katkaloya, kitoloya: —Shihkakik, kinostik EliYah.

<sup>36</sup>Kwakin motaloti se, okipaltil ka nihugoUba chichik, ka se pochinki okital pa se otat kitehkolti kimak pa koniskya, kitowaya:

—Shihkawak; ma tikitak ta EliYah walas kitemowis.

<sup>37</sup>Kwakin Yehshwa tsats ka chikawaliste, wan omik.

<sup>38</sup>Kwakin in tatahkitil weyak tilawak pa in tyopWe tsayani

---

v 15:28 In takwihkwilolme kikwihkwilot takwitap, onka hanwel pa berso 28.



© 1996 David C. Cook

*Se gwacho ki'ishmati Yehshwa  
pa kruskawit (Markus 15:39)*

in kinek kito, kampa mostatik amo motikipanowaya in tonatmosewilyudiyo,<sup>x</sup> <sup>43</sup>Yosé yewal katka pa in pweblo Arimataya ka in wehwetatakewalme yewal niyok kichishtikatka nireynarolisteDyos, oy kaha Pilatos amo momaptiyaya pa kitahtanis nimihki Yehshwa. <sup>44</sup>Pilatos

ipanta omochi ome, takpak waltsayan o'as tatsinta. <sup>39</sup>In we tatakewan gwa-cho' moketstikatka pa'ishpa yewal kitatikatka kina tsatsi Yehshwa, wan omik, kwakin kito:

—Melak in takat katka nikonDyos.

<sup>40</sup>Niyok sek siwam tachishtikatkaloya wEhkit; yehwante katkaloya Marya in siwat takati pa Magdala, Marya yewal katka ninantsi Yakobo yewal tipichi wan Yosé, wan Salomé, niyok ompa katkaloya oksek siwam ka yehwante. <sup>41</sup>Inik siwam nehnemtinemiloya wan kitikipanoliloya Yehshwa, kwah katka pa Galileya. Wan katkaloya oksek myak siwam, yehwante yaloya inak yewal pa Yerushalém.

**Yehshwa kitapachok**  
(Mt. 27:57-61; Lk. 23:50-56;  
Yh. 19:38-42)

<sup>42</sup>Kwah tapoh-poyapti, in tonat kampa katka nitayokshitoliste,<sup>w</sup>

<sup>w</sup> 15:42 Víspera in kinek kito: Katka in tonat pa motayokshitoliloya masewalme pa Isra'El.

<sup>x</sup> 15:42 Tonatmosewilyudiyo in kinek kito: kampa mostatik amo motikipanowaya.

motapololti kwah kimat, kampa Yehshwa miki, wan tatake okinotsak pa walaskya in wetatakewan gwacho' yewal o'as ka Pilatos okitahtanil ta melak omik Yehshwa. <sup>45</sup>Kinankili in wetatakewan gwacho' kampa omik. Kwakin Pilatos kikawili Yosé, ma kiwik nimihki Yehshwa. <sup>46</sup>Wan Yosé okiko se shashal wan okitemo nimihki Yehshwa, okilyar pa shashal. Wan kitali kahakoyonkeTeshkal, kimihmilo se tet ka kitsakwa kahakoyonkeTeshkal. <sup>47</sup>Wan Marya in siwat takati pa Magdala, wan Marya ninantsi Yosé, tachishtikatkaloya kaha kitaliloskya nimihki Yehshwa.

### Yehshwa oyol oksep

(Mt. 28:1-10; Lk. 24:1-12; Yh. 20:1-10)

**16** <sup>1</sup>Kwah opan in tonatmosewilyudiyo, Marya in siwat takati pa Magdala, Salomé wan Marya ninantsi Yakobo, kikowak aseYTE kwal ahwiyalme yaloya kishawililoYA nimihki Yehshwa. <sup>2</sup>Katka watsinkit, in tonat kipewalti ta'ishpa yewal chikomeTonatim wan oyak yehwante asik kaha kintapachol mihmihki, kwah kistiwalaya tonat. <sup>3</sup>Yehwante pa ot mo'ilitiyaloya:

—Ak tishmihmilo'ili in tet ka tatsakwal kahakoyonkeTeshkal?

<sup>4</sup>Ma yok tachiyak, kitak tamihmilol in tet, yewal hyero we.

<sup>5</sup>Kwah kalakik kahakoyonkeTeshkal, kitak se takatYankwik



© 1996 David C. Cook

*Siwam kitak in kahakoyonkeTeshkal tapotik (Markus 16:4)*

yowatikatka pa nimahwakwal, katka tatakemiltili ka se takemtel istak weyak; wan yehwante momaptik. <sup>6</sup>Ma yok yewal kinmili:

—Amo shimomaptik; ankitemotikat Yehshwa in nasareteko, yewal ki'ilpik pa kruskwawit. Oyol oksep; amo nika onka. Shitachiyak kaha kitalik. <sup>7</sup>Shiyak wan shikinmilik nimonesh-tililme, wan Petros: “Yewal anmishchishtiyas anmehwante pa Galileya ompa ankitaske, yok kina kitowaya.”

<sup>8</sup>Kwakin siwam kisak pa in kahakoyonkeTeshkal, motalotiyaloya kampa momaptitiyaloya, moyoyokatiyaloya. Amo'ak amoten kinawatik pates momaptitiyaloya.

**Yehshwa moneshti ka Marya in siwat takati pa Magdala**  
(Yh. 20:11-18)

<sup>9</sup>Kwah oksep yoliyaya Yehshwa pa watsinko in tonat kipewalti ta'ishpa yewal chikomeTonatim, omoneshti yewal ta'ishpa pa Marya in siwat takati pa Magdala, yewal okinkishtil chikome niyehyekat tawalilot. <sup>10</sup>Wan in siwat oy kinmashti yehwante nehnemtinemiloya inak Yehshwa, kampa katkalo-ya moyokoltitikatkaloya wan chokatikatkaloya. <sup>11</sup>Kimani



© 1996 David C. Cook

*Yehshwa omoneshti ika Marya in  
takati pa Magdala (Markus 16:11)*

yehwante kikakik kampa Yehshwa yoltikatka, wan Marya okit, amo kineltokak.

**Yehshwa moneshti ka in ome nimonestililme**

(Lk. 24:13-35)

<sup>12</sup>Hani takwitap, Yehshwa amoyok omoneshti ka in omen-  
te nimonestililme yaloya pa ot kaha tashosholtik. <sup>13</sup>Yehwante  
oyak wan kinmashtik oksek; wan niyok amo kineltokak.

**Yehshwa okintetan pa yaloskya pa mochital in tatitanilme**

(Mt. 28:16-20; Lk. 24:36-49; Yh. 20:19-23)

<sup>14</sup>Kwah opan in kwakin omoneshti Yehshwa ka in 11, yowa-  
tikatkaloya kaha takwal; wan okinahwa kampa amo tanel-  
tokaloya kampa ininyol kipiyaloya chikawaliste, kampa amo  
kinneltokaloya nahyehwante kitak kampa yoltikatka. <sup>15</sup>Wan  
kinmili:

—Shiyak pa mochi kishki tal, shikinmilik tamashtilisteKwal  
pa mochi yoliliste. <sup>16</sup>Aki taneltok wan yes takwatekil, yok  
yes takishtiliste; wan aki amo taneltoka, yes tateshpawiliste.  
<sup>17</sup>Wan inik taneshtiliste kitokaske yehwante taneltokal: Ka  
no'itokaliste kinkishtiliske niyehyekatim tawalilom; tahtoske  
ka oksek tahtolme; <sup>18</sup>kinketskiski kowam ka ininmahwam,  
wan ta konik ten tatawanti, amo kinkokolti; wan kintaliliske  
ininmahwam pa kokoshkim wan inik kokoshkim pahtiske.

**Yehshwa tehko pa takpakIlwikak**

(Lk. 24:50-53)

<sup>19</sup>In TATS Yehshwa otam otahto, takis pa ilwikak wan omo-  
tal pa nimahwakwalDyos. <sup>20</sup>Wan yehwante kwakin kisak, wan  
tamashtitinemil pa kaha han. Wan in TATS kinpalewiya, yok  
in tahtolme katka melawak ka in taneshtiliste ka chikawaliste  
yehwante tanishtililoya. Yok ma ye.